

東  
華  
續  
錄

東華續錄

乾隆四十五

臣王先謙敬編

臣周瀚蕃恭校

乾隆二十二年春正月甲午諭軍機大臣等見在齊集大兵前赴巴里坤定期三月內進勦將軍重任甚難其人成衮扎布熟悉蒙古事務且深感朕恩誠心報效著授爲定邊將軍卽帶領索倫兵丁二三百名由阿濟必濟前往巴里坤並著賞給整裝銀五千兩其子弟內有願帶往者聽其奏聞帶往北路事務亦屬緊要伊弟車布登扎布才情幹練著暫行署理定邊左副將軍印務此次進兵非初定伊犁可比見在賊勢窮蹙擒勦甚易成衮扎布勤勞已久應示體恤俟進兵擒獲首惡之日卽速來京陛見毋庸久駐行間一切善後事宜朕另派大臣等辦理舒赫德富德鄂實俱著授

爲參贊大臣色布騰巴勒珠爾阿里衮明瑞額勒登額及侍衛什布圖鎧巴圖魯奇微布等俱著在領隊大臣上行走○以南巡免江蘇安徽浙江二十一年以前未完民欠○乙未諭軍機大臣等莊有恭所辦朱昉贖罪外結一案情弊顯然尹繼善理應迅速查審據實奏聞計該督接奉諭旨應在十二月初四五間乃於十二月初八日奏事摺中並無一字言及遲回觀望必俟愛必達抵任後始聯銜入奏而其所奏又不過許松佶稟覆之詞空言敷衍此等案件豈可如此迂緩辦理莊有恭平日辦事並非糊塗竊率之人乃於人命重案輒敢如此專擅若非別有情節何至悖謬乃爾尹繼善身爲總督何得諉爲不知看來此案情節許松佶必知之甚悉卽其稟內所云莊有恭於十一月內業將奏明緣由飭知臬司又云曾經請示莊有恭面諭俟罰項完足之日始可入奏天下

豈有絞候重辟督撫擅自問擬不先奏明遽行准贖收銀至丁憂離任始以一奏卸責經朕降旨查審之後事已發露尙得謂之已經奏明乎莊有恭原摺內所稱該縣有借動之項見不無虧空等語前經降旨詢問尹繼善亦未將此項原委詳悉聲覆但以查賑動項借此還款爲詞豈去歲江省紳士因歲歉捐賑皆係有罪應罰之人耶又如該縣無朱冊之案其煮賑借動之項將作何歸楚耶許松佶情詞閃爍顯有別項情節業經批令解任嚴審著傳諭尹繼善等作速徹底根究務得實情卽行覆奏儻模稜兩可仍存大事化小小事化無之見希圖苟且完結朕必另派大臣審訊不患不水落石出斷不肯含糊了事也尹繼善自度能當此咎耶並將此諭令愛必達知之○戊戌諭軍機大臣等據雅爾哈善等奏稱自伊犁前來之察哈爾阿什達等告稱聞阿巴噶斯等屬人及

布庫努特扎哈沁人等與副將軍兆惠交戰賊眾力不能敵等語  
此信既確亟宜遣兵赴兆惠處應援昨雅爾哈善等奏派侍衛圖  
倫楚等帶兵八百名先往因兵數不多是以降旨停止仍令俟大  
兵齊集同進今據阿什達所稱不過窮賊眾原易勦滅再得圖  
倫楚等領兵協助甚合機宜著卽照雅爾哈善等前奏辦理毋庸  
停止○以莽古齊爲參贊大臣赴北路軍營○免甘肅十六年至  
二十年未完地丁錢糧甘州等五府縣衛本年額賦○己亥以哈  
達哈爲參贊大臣駐科布多○以託恩多署江蘇布政使杜官德  
署江蘇按察使由江安糧道署○庚子以哈爾阿永貴爲北路參贊大臣  
○辛丑撥部帑二百萬兩於甘肅備用○癸卯 上奉 皇太后  
啓鑾南巡○甲辰諭汪由敦著實授吏部尙書何國宗著調補禮  
部尙書其所降之級帶於新任工部尙書員缺著秦懃田補授趙

宏恩著仍回左都御史之任刑部侍郎員缺著王際華調補工部  
侍郎員缺著錢維城補授○諭軍機大臣等杜爾伯特郡王車凌  
孟克貝子羅壘雲端布圖克森扎薩克台吉尼爾瓦齊等俱因出  
痘身故車凌孟克等輸誠內附深感朕恩勉力報效今聞溘逝深  
爲軫惻著交部照例致祭派侍衛瑚畢圖前往奠醑並加恩令車  
凌孟克之子巴雅勒當承襲郡王羅壘雲端布圖克森並無子嗣  
貝勒剛多爾濟貝子額爾德尼乃羅壘雲端等族人其所屬人等  
卽交與剛多爾濟額爾德尼管轄尼爾瓦齊亦無子姪其扎薩克  
台吉著伊叔布顏德勒格爾承襲○命莊有恭家居待罪調白鍾  
山爲江南河道總督張師載爲河東河道總督楊錫紱爲漕運總  
督實授愛必達江蘇巡撫○乙巳直隸總督方觀承奏天津等十  
三州縣馬廠地畝奉旨賞民報墾升科守爲世業若仍存馬廠名

色恐僻壤愚民觀望不前請改爲恩賞官地字樣從之○丙午免直隸靜海等三州縣未完銀米○丁未免經過直隸山東地方本年額賦十分之三被災地方十分之五○戊申論據尹繼善等奏稱莊有恭許松估辦理朱昉贖罪外結實在情節及張穀孫等聯號罰贖等案非莊有恭到案質對不明請旨將莊有恭革職押解來江等語莊有恭簡任封疆種種妄謬至於如此深負朕恩實出意想之外著照該督等所請莊有恭著革職拏問至案內應行審質之王者輔著革去知州職銜蘇州府知府趙西通州知州王繼祖俱著解任交與該督撫一併嚴審究擬具奏○己酉諭軍機大臣等尹繼善愛必達等審訊莊有恭所辦朱昉贖罪外結一案殊有遷就完結之意試思爲督撫者豈有入人死罪並不奏明擅自准贖之理乃其摺內僅稱莊有恭悖謬荒唐所奏詞語竟似牽合

遮飾別有情弊而其實此項銀兩俱係撥補煮賑銀米並無私行  
動用等語如此則莊有恭所辦爲是乎爲非乎卽如尹繼善此時  
罰人以三萬金贖罪其交官之項自必分毫不爽至別有加增自  
潤必又在正罰之外乃卽以交官有著爲開脫而外此有無別項  
置之不問此豈可蒙混完結者乎且見據查出王者輔父子招搖  
請託贓蹟種種尹繼善果能深信莊有恭竟屬一塵不染其事何  
以俱已准行乎王者輔雖自認撞騙然亦安知其非避重就輕乎  
至張穀孫等聯號贖罰一案見有莊有恭所發紅單及朱奎揚稟  
稟爲據其情節顯然更不待問矣尹繼善若於案犯提到時自應  
將各犯有無賄屬貨緣之處詳加確訊而乃欲以悖謬荒唐一語  
希圖草率了事在尹繼善固其常技愛必達初抵江蘇何亦隨同  
附和至此耶俱著傳旨嚴行申飭看來此二案非該督撫所能審



出實情者著將朱聃王者輔及張穀孫等犯帶赴接駕處朕當另  
派大臣審訊耳此際中途伊二人仍當逐細研鞫務得實情速行  
奏聞尹繼善等如能將此中情弊迅爲審辦明確尙可以贖前愆  
若復遷延觀望待他人審出實情伊二人何以自處可一併傳諭  
知之○癸丑諭軍機大臣等杜爾伯特親王伯什阿噶什輸誠內  
附具見悃忱今聞溘逝深堪憫惻著唐喀祿齋銀三百兩前往車  
凌部落給與伯什阿噶什家屬辦理喪事並齋茶酒往奠伯什阿  
噶什並無子嗣著將伊兄子協理台吉達巴都噶爾封授貝子伊  
弟達瓦濟特封授公爵俱授爲扎薩克其所屬人眾卽令此二人  
管轄伊等屬人無多或卽歸入車凌等部落居住或願移至內地  
並著唐喀祿明白曉諭聽從其便奏聞辦理○諭據成衮扎布等  
奏稱輝特部落車布登多爾濟普爾普德濟特等向巴蘭泰告稱

阿逆雖與伊等同族惟是身受厚恩斷不至墮其詭計儻阿逆前來煽惑必奮勇力戰擒獻治罪等語觀此則車布登多爾濟等自無異志第恐其不免疑懼舊傳諭車布登扎布哈達哈等止宜密爲防範不得稍露形迹令其驚疑前已降旨令伊等仍住烏蘭固木地方種地一年再行遷移伊等不勝感悅適經唐喀祿奏請將察達克等移至烏蘭固木地方俟輝特人眾遷移後卽令察達克等居住此處若照伊所奏令察達克等同居一處在察達克等旣須守候伊等遷移方得安居且見與輝特人眾同居一處轉啓伊等疑惑殊屬未便已降旨停止並傳諭車布登扎布哈達哈等知之○諭據成衮扎布等奏稱叛賊青滾雜卜之子車蘇隆多爾濟齊旺扎布交與素尼勒圖色楞額等解赴京師等語車蘇隆多爾濟齊旺扎布皆逆賊之子著傳諭大學士來保俟其解到卽遵旨

正法○以內閣學士阿思哈爲北路參贊大臣○乙卯諭軍機大臣等據雅爾哈善奏稱莽噶里克將噶勒藏多爾濟所差使人布圖庫拏解前來等語噶勒藏多爾濟既係寄信莽噶里克恐雅爾哈善等不識其意以致刑訊伊之使人著寄信於雅爾哈善曉諭使人布圖庫言大皇帝諭旨能識爾托忒字蹟觀爾所寄書信知係爾台吉噶勒藏多爾濟遣使呈報哈薩克錫喇尼瑪等背叛莽噶里克反以爲爾等背叛藉辭將爾解送至此以便偵探伊子白和卓信息恐大臣等不識字蹟將爾屈訊爾但放心前來陛見到時經朕問明將曉諭爾台吉諭旨一併帶回如此曉諭後並將朕諭旨硃批與布圖庫閱看雅爾哈善等卽選妥幹人員將布圖庫並解送之回人由河南速行解赴行營沿途加意照管勿致伊等疑懼○丙辰命夢麟往江南山東查估荆山橋工並履勘積水災

區○己未以格璜爲江南副總河

原任吏部侍郎

○庚申諭前經降旨鄉

試第二場止試以經文四篇而會試則加試表文一道良以士子名列賢書將備明廷制作之選聲韻對偶自宜留心研究也今思表文篇幅稍長難以責之風簷寸晷而其中一定字面或偶有錯落輒干貼例未免仍費檢點且時事謝賀每科所擬不過數題在淹雅之士尙多出於夙構而倩代強記以圖僥倖者更無論矣究非覈實拔真之道嗣後會試第二場表文可易以五言八韻唐律一首夫詩雖易學而難工然宋之司馬光尙自謂不能四六故有能賦詩而不能作表之人斷無表文華瞻可觀而轉不能成五字試帖者况篇什既簡司試事者得從容校閱其工拙尤爲易見其卽以本年丁丑科會試爲始見在各省會試舉子將已陸續抵京該部卽通行曉諭知之○諭軍機大臣等雅爾哈善等奏據署提

督傅魁等呈稱帶兵一千名前至鹽池地方遇莽噶里克三十三賊盡行勦殺等語莽噶里克係負恩背叛附和逆賊戕害將軍和起之首惡傅魁等帶兵圍住時應將伊父子生擒解送審明附逆背叛實情以正國法况領兵一千圍住三十餘賊生擒甚屬易易並非賊人眾多交戰之際不能辨別賊首者可比是傅魁之殺戮莽噶里克非特怯懦悖謬其中不無別情著傳諭雅爾哈善即將傅魁拏解來京審訊拏解傅魁後並將副將丑達解送來京以便與傅魁質對再前曾降旨俟辦理莽噶里克後即將吐魯番地方賞給額敏和卓管轄今莽噶里克雖死應尚有伊妻子及平日任用之人即著額敏和卓前往接查向伊等究出莽噶里克率眾前來實在情形並著額敏和卓即揀選所獲馬匹派委幹員前往探聽副將軍兆惠信息及厄魯特等情形其遣人由何路前往並見

在彼處所得信息卽著申報巴里坤大臣轉奏○壬戌諭大學士  
史貽直謝事歸田協辦大學士尙書梁詩正請假終養在籍均甚  
屬安靜可嘉茲值南巡前來接駕俱著加恩照其品級在家食俸  
侍郎錢陳羣從前在京供職勤慎今養疴林居亦著加恩在家食  
俸以昭眷念舊臣之意○諭軍機大臣等前據彭家屏面奏上年  
豫省有被災處所而圖爾炳阿則以爲並不成災是以命伊二人  
同往查勘今詢之張師載則奏稱他處或聞有歉收田畝惟夏邑  
被災獨重等語張師載係老實人自當不作誑語看來皆屬圖爾  
炳阿之過可傳諭圖爾炳阿令其秉公確查據實速奏若復稍存  
迴護置民瘼於不問則大非朕委任封疆之意恐圖爾炳阿亦不  
能當此咎也○諭雅爾哈善等奏審訊噶勒藏多爾濟所遣宰桑  
布圖庫供稱噶勒藏多爾濟同扎那噶爾布哈薩克錫喇尼瑪等

謀叛屬實又稱兆惠帶兵由招摩多前往阿爾台爲塔本集賽宰桑達什車凌中途邀截等語噶勒藏多爾濟如果無背叛實情自當分別辦理然此等叵測之人難保其終不生事今既與扎那噶爾布等同叛大兵前往卽將伊等盡行翦滅自可永絕根株至布圖庫所供兆惠之信未必確實果爾則塔本集賽人等斷不容貸亦應一體辦理前已降旨令將布圖庫解送行在審訊實情另降諭旨著仍照前旨行至雅爾哈善奏稱布圖庫所供各鄂拓克人眾俱不可深信等語見在準噶爾當窮蹙之時其所有烏合之眾不過如是布圖庫必不肯故爲示弱以誘我兵前進雅爾哈善心存怯懦所慮不免過當再傳魁辦理莽噶里克一事其中必有別情已降旨將伊拏問此次進兵若噶勒藏多爾濟扎那噶爾布哈薩克錫喇尼瑪等果在陣前立斃則已如可生擒則舒赫德等務

將伊等擒解前來不得卽行正法並傳諭成衮扎布知之

二月癸亥朔免經過江南浙江地方額賦十分之三被災地方十分之五○賜原任左都御史梅穀成在家食俸○乙丑諭朕翠華南幸載莅江淮問俗省方洪敷愷澤而兩淮眾商皆未登仕版之人其承辦差務踴躍急公宜沛特恩以示獎勵伊等本身原有職銜如已至三品者俱著賞給奉宸苑卿銜其未至三品者俱各加頂帶一級又諭兩淮辦差商眾見已加恩優敘更念該商等銷引辦課歲額通完而於地方公事更樂輸恐後卽如前歲江省災務在國家之撫恤雖已數逾千萬而淮揚煮賑半出商捐其桑梓任恤之誼深可嘉予著再加恩自丁丑綱爲始綱鹽食鹽每引加賞十斤不在原定成本之內以二年爲限庶民食旣足而商力亦紓以示恤商愛民之意○諭軍機大臣等據唐喀祿等奏稱輝特人



眾自遷至扎克賽地方自相搶掠甚不安靜且本係阿逆親屬將來不免滋事請旨遷至呼倫貝爾齊齊哈爾等處設有事端彼處密邇索倫辦理甚易等語唐喀祿等所奏甚是輝特人等原非善類自應豫行辦理但見在科布多駐兵無多而伊等又無背叛實據且與其遷至呼倫貝爾齊齊哈爾等處又不如卽行勦滅永絕根株著傳諭車布登扎布等悉心查察如已有可疑形迹卽將伊等勦滅如尙安本分應暫爲安撫惟宜加意防範俟將來再行辦理唐喀祿所奏巴勒濟得木齊懇請同色布騰遷往察哈爾居住等語從前軍機大臣等議將巴勒濟屬人歸入輝特部落令在烏蘭固木種地業經准行今巴勒濟得木齊旣願往察哈爾居住俟其至烏里雅蘇台時卽照唐喀祿所請賞給口糧送至察哈爾地方安插不必仍照前旨辦理○諭成衮扎布等奏據遣往杜爾伯

特致祭之侍衛佛保報稱中途遇瑪哈沁搶掠駝隻見在勉力前進等語佛保係從前遣往致祭伯什阿噶什之妻今伯什阿噶什亦已病故佛保即可毋庸前往乃遇賊搶掠仍能奮勉行走甚屬可嘉著查明係何等侍衛加恩升用不必再行前往再伯什阿噶什病故時朕加恩封伊弟姪貝子公爵並授爲扎薩克令其屬人等歸入車凌部落安置因其懇請向內遷移復命唐喀祿詢問伊等情形奏聞辦理今伊等旣自相搶掠復敢劫奪奉使侍衛駝隻則不惟不應加恩封爵亦毋庸任其向內遷移著傳諭瑚爾起等俟帶兵到時卽將劫奪侍衛爲首賊人盡行勦殺餘俱賞給喀爾喀等爲奴並著傳諭車布登扎布等遣人前往曉諭伊同部落之貝子烏巴什等告知此次發兵特爲擒治搶掠侍衛之人至爾等尙屬安分可仍照伊從前所請帶領屬人卽赴杜爾伯特汗車凌

遊牧同住仍將伊等何時起程及情形如何詳悉奏聞○以謝溶

生爲內閣學士

由翰林院侍讀學士遷

○予故吏部尙書王安國祭葬諡文

肅○丙寅諭軍機大臣等據雅爾哈善等奏稱副將軍兆惠等遣領催雲多克等報稱正月初五日至烏魯木齊途中殺賊千餘人其侍衛圖倫楚所領兵丁與兆惠相距止四五日又圖倫楚遣人告稱約二月初十日內即可同兆惠至巴里坤等語覽奏甚爲欣悅前布圖庫供稱兆惠由招摩多前往阿爾台朕卽知其言不足信今果由西路前來兆惠係駐紮伊犁等處辦事大臣適遇厄魯特等背叛奮勇勦賊甚屬可嘉兆惠著封爲一等伯世襲罔替並將御用荷包玉牒鼻煙壺加恩賞賜三格哈甯阿永貴莽阿納俱著賞給三等輕車都尉亦著世襲罔替兆惠所遣報信之雲多克德楞徹俱授爲三等侍衛圖倫楚等所遣之副護軍校濟德著授

爲護軍校圖倫楚達禮善此次亦屬奮勉著賞給圖倫楚副都統  
職銜授達禮善爲頭等侍衛奮勇官兵著查明交部議敘並著照  
例賞賚所有陣亡官兵著兆惠等查明交部議卹至健銳營委署  
前鋒校納蘭圖索倫委署章京成果達什達瓦屬人色勒前往偵  
探擒剿賊人亦屬勇往著加恩賞給納蘭圖成果孔雀翎色勒授  
爲三等侍衛仍各賞銀五十兩此時兆惠等諒已抵巴里坤軍營  
著會同將軍成衮扎布參贊大臣舒赫德等悉心籌畫或兩路進  
兵或合爲一路務期同心協力奮勇前往至進兵時索倫兵最爲  
得力除兆惠等帶回受傷兵丁毋庸調遣其餘兵丁仍酌量帶領  
前往並著發往孔雀翎藍翎各二十支交兆惠等分賞奮勇效力  
官兵以示鼓勵並著於哈甯阿永貴三格三人內酌派一人馳赴  
行在備朕詢問厄魯特人等反覆無常實爲覆載所不容至達什

車凌與哈薩克錫喇尼瑪等同謀叛逆尤爲罪不容追其屬人必應全行剿滅不得更留餘孽今大兵自巴里坤分路進剿賊人等逃入烏梁海亦未可定著車布登扎布等傳諭烏梁海內大臣察達克等加意防範如有厄魯特逃至彼處即將首賊擒拏送烏里雅蘇台將軍大臣辦理餘眾悉行擒治毋任脫逃再據坐臺厄魯特孟克告稱解到羊五百隻遇一索倫官員搶去在臺之察哈爾等亦俱隨往又干總車布登同臺站筆帖式俱往噶勒藏多爾濟游牧未回等語索倫官員及隨往之察哈爾究係何人車布登等因何潛往噶勒藏多爾濟游牧見在何處俱著兆惠等查明具奏

○丁卯祭 河神 上奉 皇太后渡河至天妃閣閱木龍○諭

原任大學士內大臣高斌前任河道總督時頗著勞績卽如毛城鋪所以分洩黃流高斌設立徐州水誌至七尺方開後人不用其

法遂至黃弱沙淤隱貽河患其於黃河兩岸汕刷支河每歲冬季必督率廳汛實力填築近年司工疏忽因有孫家集奪溜之事至三滾壩洩洪湖盛漲高斌堅持堵閉是以數年之間下游州縣屢獲豐收其功在生民自不可泯至於癸酉張家馬路及運河二閘之決則又其果於自信抑且年邁志滿之失朕不得不治其罪而要其瑕瑜自不相掩在本朝河臣中卽不能如靳輔而較齊蘇勒楮曾筠朕以爲有過之無不及也茲者翠華南幸追溯前勞特沛恩綸用孚公論可與靳輔齊蘇勒楮曾筠一併祠祀以昭國家念舊酬功之典且亦使後之司河務者知所激勸也該部其遵諭行○諭禮部侍郎沈德潛致仕歸田年逾八十實爲蓬瀛人瑞今來接駕著加恩給與禮部尙書銜以示優念老臣之意○免江南十年以前漕項積欠○免兩淮竈戶十七年至十九年未完折價銀

兩○戊辰諭昨以內大臣高斌前在南河懋著勞績特頒恩諭令與靳輔齊蘇勒椿曾筠一同祠祀更念有明一代治河之臣最著者惟陳瑄潘季馴二人而季馴之功實優於瑄運道民生至今攸賴今清江之湄瑄有專祠季馴獨不列祀典朕甚憫焉其以潘季馴與陳瑄並祠有司春秋致祭用昭崇德報功之典○諭軍機大臣等兆惠咨雅爾哈善文內有厄魯特反覆無常應盡行剿滅之語兆惠目擊彼處情形所籌甚是從前朕已向舒赫德面降諭旨伊二人見將軍成衮扎布時悉心籌畫務宜妥協辦理此等賊人斷不宜稍示姑息惟老幼羸弱之人或可酌量存留另籌安插前此兩次進兵皆不免過於姑容今若仍照前辦理則大兵撤回伊等復滋生事端前事可爲明鑒卽如鄂勒哲依吞圖布庫圖齊等此際雖未敢妄動而當兆惠被圍時並未見前來策應此次進兵

務將伊等解送來京或姑免其死給與效力之處已屬格外施恩  
儻稍有可疑亦一併擒拏治罪著傳諭成衮扎布兆惠舒赫德等  
遵照辦理儻兆惠所見或有不同之處亦卽與成衮扎布等一面  
議定一面奏聞伊等務卽奮勇前進迅奏膚功以副委任○己巳  
增江蘇安徽浙江歲試學額○減江蘇安徽浙江軍流以下罪○  
壬申吏部等部議奏八旗另記檔案及養子開戶人等上年三月  
內經戶部奏定俱准出旗爲民其在京文武官員停其升轉旗缺  
如屆應升應調應作何改調漢缺之處交吏兵二部定議其外任  
文職綠營等官本非在京旗缺應卽令出旗爲民見在捐納候選  
人員並閒散繙譯二項進士舉人生員等亦准其爲民至如何考  
試錄用之處交吏禮兵等部辦理等因查此項另記檔案人員乾  
隆十六年清查時凡見任文武各官曾蒙恩旨但停升轉免其革



退今應仍遵前旨行如有特著勞績賢能出眾之員在內之文職  
許該堂官保題漢缺武職許都統步軍統領保題在外之文武各  
官許該督撫將軍保題均候旨辦理其見任文武係旗缺者出缺  
後不便再補係候補漢缺者但准補用補後傳其升轉其一應舉  
貢生監應照乾隆六年題准之例如原係另戶抱養民人爲子者  
准歸入民籍應試如本係家奴開戶另記檔案者其本身止許頂  
帶終身不得再行考試此項人等既經出旗爲民其子孫應各照  
該籍民人例一體辦理從之○乙亥祭江神 上奉 皇太后  
渡江○癸未 上幸宋臣范仲淹高義園○諭軍機大臣等據白  
鍾山張師載所奏准徐湖河疏築事宜一摺其所稱河身淤淺之  
處切灘挑渠並增築隄工及堵築北岸支河以防衝刷奪溜二條  
實爲此時第一要工自應急爲籌辦而駱馬湖居六塘河之上游

受水既多湖隄殘缺必應修築堅厚方足以資捍禦以朕視之亦非可緩待之事也若謂工程派委乏員不獨安徽州縣佐貳可以檄調卽河南山東二省佐貳官亦何不可酌調者而宿遷一帶貧民甚多朕車駕經臨得之目覩則以工代賑在工程既不致稽延於窮黎更屬有益亦何無人應募之足慮耶荆山橋挑濬工程見有侍郎夢麟在彼督辦頃據張師載奏稱人夫雲集竣工自易其淮徐湖河各工白鍾山嵒璜身任總河自當悉心商辦見又令高晉前往會同辦理張師載雖赴濟甯但運河見無可辦之事自當仍來荆山橋駱馬湖等處伊等當同體朕軫念民生至意公同酌議每最要處分一人獨任其事同時並舉而分之中又宜和衷共濟聯爲一體不可稍存自了之意當使各處止如一處而諸人止如一人方見伊等實心出力不負朕之倚任也已於摺內批諭可

再詳悉傳諭示之○甲申 上奉 皇太后臨幸蘇州府○諭准  
徐湖河各工億萬民生攸繫朕宵旰憂勤時殷軫念頃者翠華南  
邁再莅江南於清黃交匯處及高堰石工雖已親臨閱看而徐州  
一郡地處上游南北兩岸相距甚迫遠承陝豫諸水一遇盛漲時  
有潰決之患是以特命白鍾山張師載樁璜高晉前往確勘形勢  
妥速籌辦俾城垣民舍永獲安全今據白鍾山等奏於河身淤淺  
之處切灘挑濬並增築隄工及堵築北岸支河爲南北分籌之議  
夫河工一事自石林口之漫溢張家馬路孫家集之衝奪黃流勢  
弱不能刷沙直趨致河底沙停大溜側注其受病已非一日爲今  
之計舍此亦別無良法朕巡省所至首在勤民而湖河要工所關  
尤鉅一切應濬應築奏牘批答自不如親臨相度得以隨處指示  
也擬於回鑾渡淮後由順河集前往徐州卽由徐州取道至山東

之曲阜展謁 孔林用申仰止之忱 皇太后鑒輿仍由順河集  
先至泰安府之靈巖山駐蹕所有自宿遷至徐州及山東一帶營  
尖道路俱務從簡約但取足供行走頓宿而已不必過求齊備以  
副朕廑念民瘼親閱河工之本意○乙酉 上奉 皇太后臨視  
織造機房○諭禮部代會試士子謝恩本內據士子龔起等呈詞  
有稽千佛之名經及載廣雲漢之詩等句夫千佛名經乃唐人下  
第者欣羨之詞語甚鄙俚在制科鉅典自當誦習聖賢非先王之  
法言不敢道豈得漫爲摭拾至雲漢之詩則與周宣憫雨詩相溷  
龔起等草茅之士未諳體制尙無足責而禮部堂官據詞入奏何  
以不加檢點蓋以爲此等呈謝章奏朕或未必留心披閱豈知朕  
日理萬幾安肯以事屬尋常遂不寓目耶陳世倌何國宗等卽未  
能詳檢金德瑛久侍內廷何乃亦疏忽若此俱著傳旨申飭此本

發還改撰進呈○諭上年逆賊阿睦爾撒納及阿布賚之得以脫身逃竄西北兩路領兵大臣彼此互相歸咎其時達爾黨阿等帶領西路官兵追捕阿睦爾撒納前後相距不過里許而乃爲人所給以致還遁北路哈達哈等則既探知阿布賚所在故意遲回不卽掩獲迨已逸去始勒兵追躡其後夫軍務機宜閒不容髮竟皆交臂失之其奚所歸咎前因一時委用乏人且事在萬里之外難以懸定必須查詢明確方可定其處分今詢之陸續自軍營來者則眾口一詞前後脗合是達爾黨阿哈達哈及同時參贊諸臣均無所辭其咎矣此等誤事之人若不明示譴責仍令安然保其爵位將來何以用人達爾黨阿哈達哈本身公爵及哈達哈之領侍衛內大臣俱著革退吏部尙書員缺著傅森調補工部尙書員缺著納穆扎爾補授卽兼管鑲黃旗滿洲都統阿里衮著降補戶部

侍郎兼管鑲藍旗滿洲副都統所遺戶部尙書員缺著兆惠補授  
卽兼管鑲白旗漢軍都統兆惠此次調度有方甚屬勤勞並著授  
爲領侍衛內大臣以示鼓勵其傅森之兵部尙書員缺著舒赫德  
補授仍兼管鑲黃旗漢軍都統納穆扎爾之戶部侍郎員缺著雅  
爾哈善調補所遺兵部侍郎員缺著哈達哈降補卽兼管鑲藍旗  
漢軍副都統達爾黨阿之鑲藍旗滿洲都統員缺著雅爾哈善兼  
管其正白旗滿洲副都統員缺著達爾黨阿降補至兩路參贊大  
臣哈甯阿見隨兆惠自伊犁回至軍營亦屬勤勞著免其議處扎  
拉豐阿鄂實富德唐喀祿俱著交部察議朕於諸臣功過賞罰予  
奪一秉至公毫無成見惟視人之效力何如耳並將此通行傳諭  
知之○丙戌 上閱兵於嘉興府後教場○丁亥 上閱兵於石  
門鎮○己丑 上奉 皇太后臨幸杭州府○禁營伍鑲吹細樂

○庚寅 上閱兵○禁武臣乘輿

三月壬辰朔免浙江杭州等四府屬十八年至二十年民欠○甲午 上至觀潮樓閱水師○乙未諭據雅爾哈善等奏稱將傅魁殺死莽噶里克之處詢問丑達等及隨去兵丁僉稱莽噶里克帶領二十一人遇見我兵告稱不堪厄魯特騷擾復欲探伊子白和卓信息是以投內地前來乃傅魁並不詳問伊所告言語卽喚眾將莽噶里克殺死等語此事雅爾哈善等初次具奏尙有慶幸之詞卽黃廷桂亦並不以爲非也朕據奏到卽謂傅魁辦事錯謬降旨令將傅魁拏解審訊必有別故今據丑達等及隨去兵丁所言則傅魁之罪實所難追除俟解到時詳究定罪外雅爾哈善從前並未參奏及奉旨查問始將實情究出其因循草率甚屬非是雅爾哈善著交部察議○丙申諭軍機大臣等據兆惠等奏稱領兵

至穆壘河源巴雅爾等遊牧早經遷移隨派兵至阿克塔斯烏蘭  
烏蘇庫舍圖等處按捕並無蹤迹是以回至巴里坤整齊兵力再  
行進剿等語前會降旨令成衮扎布兆惠等分兵往剿見在巴雅  
爾等紛紛逃避想係聞圖倫楚等領兵追擊畏懼潛逃但圖倫楚  
擊賊之期甚近賊眾必不能遠颺若乘其不備即將巴雅爾等追  
擒甚屬易事儻必俟大兵齊赴方行進剿則爲日稍遲恐賊眾又  
復遠竄著傳諭成衮扎布等卽揀選見在巴里坤兵丁迅速追捕  
仍遵前旨辦理不得更留餘孽再觀巴雅爾畏懼逃竄則其技已  
窮卽扎哈沁噶勒雜特等亦必係互相驚竄其勢斷不能驟合大  
兵一入自可迅奏膚功成衮扎布等務宜奮勇辦理○丁酉 上  
奉 皇太后自杭州回鑾○諭軍機大臣等額敏和卓奏稱噶勒  
藏多爾濟等已於二月初五日遷往伊犁等語噶勒藏多爾濟若



在原游牧地方則眾厄魯特等自必各據其地負隅自固今乃棄其游牧逃往伊犁明係勢窮力竭自可不日成擒且伊犁地方達瓦齊及阿睦爾撒納尙不能據守噶勒藏多爾濟又安能託足惟在官兵等奮勇前進乘其不備速行剿滅方合機宜再上年擒罕阿逆時因未派兵堵截逃竄之路以致逆賊潛逃著傳諭成衮扎布等此次兩路進兵務於噶勒奇等險要地方豫行派兵防守至噶勒藏多爾濟雖往伊犁其額林哈畢爾噶等處或仍留其屬人大兵過後潛來侵犯亦未可定並著成衮扎布委派幹員接捕倘遇伊等存留賊人卽派兵數百名交領隊大臣富德等奮力剿滅○已亥吏部議准直隸總督方觀承奏宣化府屬蔚縣與蔚州共處一城計該州縣幅員止一百四十里丁賦非多事務亦不甚繁請裁蔚縣歸併蔚州管轄從之○庚子 上奉 皇太后駐蹕蘇

州府○賜浙江召試諸生童鳳三等四人舉人授內閣中書○辛丑諭軍機大臣等成衮扎布奏達什車凌哈薩克錫喇等聞俱遷往額爾齊斯等語額爾齊斯地方見係杜爾伯特汗車凌等在彼遊牧今達什車凌等見大兵深入紛紛逃竄前往亦未可定著傳諭唐喀祿伊赴車凌等遊牧時卽傳旨曉諭令伊等各帶兵丁將逃往之厄魯特等悉行剿滅其戶口牲畜等卽賞給伊等屬人惟務將賊首解送來京以正國法毋任免脫○癸卯諭顧棟高前以保舉經學特賜國子監司業銜今朕巡省江南前來接駕念其年登耄耋經術湛深著加恩賜以國子監祭酒銜用示獎勵實學之意○乙巳諭軍機大臣等唐喀祿等奏稱喀爾喀地方見有扎哈沁特楞古特奇爾吉斯烏爾罕濟蘭及輝特存留人眾約計萬人此等均非善類日久不免滋事請將扎哈沁人等令在卡內居住

特楞古特奇爾吉斯烏爾罕濟蘭人等賞給東三省官兵爲奴其  
上年輝特部落遷移時存留七百餘人詢問車布登多爾濟普爾  
普等如不願歸併同居亦照例分賞爲奴等語唐喀祿等所奏甚  
是但不應將輝特存留人眾更向車布登多爾濟等詢問方行分  
賞見在輝特人等形迹可疑其應行辦理之處已降旨令伊等悉  
心查察此時車布登多爾濟普爾普等如稍有可疑應卽先行剿  
滅並將其所留人等一併酌辦若未辦伊等而先辦其所留人眾  
恐伊等轉藉爲口實再扎哈沁人等此時並無別情暫令遷至卡  
內居住事屬可行至特楞古特奇爾吉斯烏爾罕濟蘭人等著卽  
照古爾班和卓屬人之例一體賞給索倫官兵爲奴其應如何遣  
往之處會同車布登扎布酌量辦理○丙午諭軍機大臣等見在  
大兵前進賊眾諒無不知厄魯特等勢窮力竭必竄入哈薩克境

內惟是大兵撤回後伊等仍復占據巢穴終非一勞永逸之計著  
卽於進兵時召募回人墾種地畝並將帶往綠旗兵丁派令耕種  
不特秋成之後可資軍食且使賊人無可歸之路哈薩克勢不能  
久資養贍必致自相戕賊庶可以永絕根株著傳諭成衮扎布兆  
惠舒赫德等將作何派令耕種及防守額林哈畢爾噶一帶地方  
堵禦賊人之處公同酌議一面奏聞一面卽領兵前往○己酉  
上奉 皇太后臨幸江甯府○免江南之江甯蘇州浙江之杭州  
附郭諸縣本年地丁錢糧○庚戌 上詣 明太祖陵奠酒○  
上奉 皇太后臨視織造機房○ 上閱兵○諭軍機大臣等哈  
達哈等奏稱據輝特部落護衛阿齊呈首車布登多爾濟差人潛  
通阿逆並謀逃竄隨卽帶兵前往辦理其留駐塔密爾眾輝特等  
亦移咨車布登扎布派員擒拏分賞喀爾喀等語輝特人眾本與

阿逆同謀前會降旨令車布登扎布等加意防範相機辦理今阿齊既將賊情首告哈達哈卽領兵進剿甚合機宜至留駐塔密爾眾輝特等亦不應俱行分賞著將丁壯人等悉行誅滅其婦女酌量分賞喀爾喀方爲妥協又車布登扎布奏達什達瓦人眾見在鄂爾坤與塔密爾密邇應將分賞輝特人眾事宜曉諭伊等使其不妄生疑懼已令布林託言此項輝特人眾牲隻無多是以令其歸入喀爾喀地方分駐等語車布登扎布辦理甚謬厄魯特生性猜疑若不將實在情形諭知反啓伊等疑懼著卽將車布登多爾濟等背叛情由及領兵前往擒剿之處明白曉諭達什達瓦人等知悉○辛亥諭前因舒赫德自軍營旋時尚有心奮勉是以將伊遣往軍前加恩授爲尙書適由軍營奏事自應列將軍等銜名乃止伊一人之名具奏如此略予恩施卽形放縱舒赫德著革去尙

書仍留都統哈達哈一聞輝特等蠢動之信卽帶兵往辦尙屬勇  
往舒赫德所遺之兵部尙書員缺著哈達哈補授○建 海神廟  
於杭州觀潮樓○壬子諭軍機大臣等前因衛藏之人性好擅權  
滋事頗羅鼐故後辦理珠爾默特那木扎勒時曾經降旨將衛藏  
一切事件俱告知達賴喇嘛辦理格隆等惟令遵辦達賴喇嘛所  
交事件是以數年以來甚屬安靜無事茲達賴喇嘛圓寂覽格隆  
等請將迪穆呼圖克圖爲首之奏止稱請掌辦喇嘛等事務所奏  
殊屬含混格隆等頗有擅辦喇嘛事務之心日久恐不免妄擅權  
柄是以朕賞迪穆呼圖克圖諾捫汗之號俾令如達賴喇嘛在日  
一體掌辦喇嘛事務除明降諭旨外再諭伍彌泰薩喇善務宜留  
心遇有一切事務俱照達賴喇嘛在時之例與迪穆呼圖克圖商  
辦毋令格隆等擅權滋事將此情節已降旨交章嘉呼圖克圖命

其寫信由赴藏之扎隆克喇嘛親身密交迪穆呼圖克圖矣伍彌  
泰薩喇善止期相安無事妥爲留心毋得稍有洩漏○賜江蘇召  
試進士王昶爲內閣中書卽用諸生曹仁虎等六人舉人授內閣  
中書○癸丑 上奉 皇太后渡江○甲寅諭原任大學士史貽  
直從前爲伊子致書是以令其休致兩年以來家居安靜業已改  
悔茲朕南巡前來接駕見其精神未衰尙堪任使且宣力年久本  
係舊臣大學士黃廷桂見在兼管陝甘總督內閣需人史貽直著  
仍補授大學士入閣辦事黃廷桂仍以大學士管理陝甘總督事  
務○乙卯諭軍機大臣等據將軍成袞扎布等奏稱此次兩路進  
兵務期擒拏賊首其鄂勒哲依等如赴軍營投誠暫行安撫俟凱  
旋後解送京師等語所奏甚合機宜眾厄魯特內惟吞圖布並未  
從逆尙可寬恕其餘俱不得稍存姑息再噶勒藏多爾濟所屬宰

桑達什琳沁沙喇沁吞圖布三人情更可惡務將此三人拏獲同  
噶勒藏多爾濟扎那噶爾布尼瑪哈薩克錫喇等一併解送來京  
儼陣前受傷已重卽在彼正法以彰國憲○丙辰召刑部尙書劉  
統勳赴行在籌辦徐州河工○丁巳軍機大臣等奏臣等遵旨將  
改移運口及加築徐州石工之處與尹繼善嵇璜詳悉酌議據稱  
運口原藉淮水入運以利舟楫而洪湖全力敵黃分其餘以濟運  
若改移向南恐湖水就近多歸運河敵黃未免勢弱至徐城緊臨  
黃河原賴石工保護今將城東下洪土工接建石工實爲萬全之  
計城西一帶向有石工尙覺卑矮若再加石數層更資保障應否  
接至山根候 駕臨閱視至徐城對岸蘇家山未免阻束黃流今  
卽於此山取石辦工則河面稍寬可以宣洩無礙誠爲一舉兩得  
報聞又奏臣等遵旨以欽天監所進時憲書式樣內泥模處地名



殊非雅馴交會典館並繙書房查考今覆稱泥模處卽盛京通志所載尼布杵城繙書房擬改爲尼布楚城其船廠地方已遵旨奏改吉林至伊犁各處地名內土爾番應改爲吐魯番魯古忒應改稱魯克沁波羅他拉應改稱博囉塔拉報聞○以舒赫德爲兵部侍郎○以公泰爲湖南布政使降吳士端爲四川按察使調沈世楓爲貴州布政使劉藻爲湖北布政使以塔永甯爲陝西布政使湯聘以布政使銜管陝西按察使事

原任湖南布政使

○戊午諭楊錫紱奏請將興武江淮等衛截漕應追按丁銀兩降旨豁免一摺朕省

方所至賜資獨租動逾數百萬凡以恤民也亦以獎勞也若旗丁已領之項係給自國帑既不承役自應按例追繳而分年予限已屬施恩乃請槩予豁免出自何典卽如河兵挽緯最爲勤苦而所領日費衣帽銀兩該督等卽於月餉坐扣經嵇璜奏明朕卽降旨

准其開銷公項是應加恩者無不格外加恩南巡辦差惟旗丁不與並無出力處而楊錫紱欲乘此爲沽名邀譽之舉則斷斷不可然楊錫紱既有此奏所有應追之數卽免其按丁追繳著於楊錫紱養廉俸銀內分作八年扣還歸款如逾限不能扣清卽照例治罪以爲人臣好名者之戒○己未 上奉 皇太后渡河○閱洪

澤湖○撥哈密倉糧二萬石貯巴里坤○庚申諭據夢麟等奏報荆山橋河道挑挖完竣於三月二十八日開壩湖水通流壩下河道一律深通等語自去年孫家集奪溜荆山橋一帶淤沙爲患不細朕命夢麟白鍾山張師載高晉等分任其事疏濬並施乃得剋期成功紓朕憂懷夢麟等辦理甚屬可嘉著交部議敘其在工各員著查明咨部一併議敘○諭軍機大臣等據張師載奏稱南陽至韓莊之淹漫緯道俱用草土填築高出水面二三尺糧船銜尾

前進並無阻礙等語運河之水雖較黃河未見加長但見今荆山橋旣已疏通則彼處積水直趨南下恐運水復有長發治河之道有疏必有洩旣已疏其上流而不洩其尾閭則水無所歸勢必有泛溢之虞矣著卽傳諭夢麟白鍾山張師載高晉等速行共爲商酌將微山湖六塘河以下應行洩放之處豫爲籌度卽速疏濬先事豫防無滋後患仍著一面辦理一面卽行奏聞將此傳諭伊等知之

夏四月壬戌朔諭于榮煥倚恃內監僧人旣在街市出言戲侮巡檢復於公堂咆哮甚屬不法著發往黑龍江安插張若溥寶治甚是常亮懼海保等遂詳該督而方觀承據詳參奏甚不知大體朕豈曲庇內監之主嗣後伊等若有在外慢罵生事者聽人責懲朕皆不問卹姓干總聽太監總管之言袒護于榮煥踢打巡檢弓兵

尤屬不合著交常亮重責四十板海保富貴著交總管內務府大臣察議具奏○癸亥諭軍機大臣等向來綠營將弁怯懦取巧好爲張大是以此番用兵從未委以專任知其不足集事也上年額敏和卓奏莽噶里克附和尼瑪等爲逆傳魁見領兵在彼伊久在戎行由總兵署理提督自當感激圖報其所領綠旗兵國家豢養有年遇事驅策亦足鼓舞士眾因卽命伊帶兵一千會同額敏和卓辦理吐屬番事務適莽噶里克自行投來相遇於鹽池途次乃伊並不將莽噶里克擒獲審明實情以正國法竟併其所帶二十人盡行剿殺其辦理悖謬若此因卽擊解行在朕親加鞫訊前後情節伊俯首無辭惟稱莽噶里克已自來投如僅擊解軍營無以見己之功並令同伊進兵之丑達對質當時曾勸伊不可遽殺伊亦毫無可辨夫以一千之兵遇數十來投之賊何難就擒非若猝

遇賊眾臨陣對敵不能別白首從之可比乃必盡殺無遺是誠何心且原報殺賊三十人而丑達在彼所親見者僅二十人其十人則莽噶里克投來時所殺之厄魯特也傅魁以他人所殺掩爲己功其欺誑邀功情罪甚爲可惡緣營習氣惡劣若此不可不嚴加懲創傅魁著卽處斬並將此通行曉諭提鎮各標營以此爲鑒力除從前惡習以肅軍紀○乙丑諭河工爲運道民生所繫朕宵旰憂勤時深慮念茲者翠華南幸於高堰清口及徐州等處工程親臨閱視並與司河務諸臣詳加籌酌見今伏汛將屆且近河皆積歉之區貧民甚多以工代賑於窮黎有益而於工程亦易集事白鍾山身任總河工務自有專責但以目今時勢所有應疏應築事宜同時並舉朕意分任大臣以專其事當可速收實效黃河至徐州漸窄北岸蘇家山一帶又復迫東大溜近城石隄誠爲最要從

前已有者應加幫以培其勢從前所無者應接築以重其防著尙書劉統勳率該道王鴻勳錢度善爲經理加緊督催務於伏汛前竣工以資防護而備料集事尹繼善亦不得辭其責其六塘河以下爲沂沭諸水下游見有餘潦停積桃源宿遷諸縣阻黃臨運爲隄堰所隔積水無由宣洩窪地多成巨浸農民失業堪憫或應添建滾壩或應酌建涵洞或開導溝渠瀦爲陂澤水減一分則民間受一分之益著侍郎夢麟率該道吳嗣爵同知李宏等速行確勘次第妥協辦理至下河高寶諸河之水入江入海各有分途小港支渠排比行列但或淤或淺以致水無所歸不特沿海興鹽七邑被其患而高寶首當其衝城垣廬舍亦重爲可慮當使近江者入江近海者歸海條理井然深通暢遂不致汎濫田畝則所全實多

嵇璜前奏請於昭關設滾壩一座滾壩之下復開支河南關舊壩

改建滾水石壩此項工程並一應支河卽著嵇璜率同何煇董其事諸臣當仰體朕焦勞至意諸事公同商酌和衷共濟聯爲一體毋稍分畛域各持意見蓋治水非他政務可比必卓識遠慮明於全局又不執意見廣咨博採而能應機決策其委用河汛員弁則一本大公好惡毫無偏徇備此數者庶或可濟顧安得斯人而授之重任耶且所興建埽壩各工率以意增益一經准建歲歲加修其以險已化平停止者百不一二此或由河臣沿襲因循漫不省視更或故留爲河員養贍計所謂帑歸實用者固如是乎卽欲爲河員計與其留此無用之工何不移之有用之地亦可資其搶護不致潰決成災此皆不能慮患於事先惟求苟免於無事一經決裂雖悔何追此司河務諸臣所當銘刻提撕奉爲炯戒也徐城南北各工見今培厚加高者仍令張師載高晉分辨務於四月完竣

後交白鍾山收工各回本任見今各工應需一切物料並著會同  
總督尹繼善巡撫愛必達高晉等酌辦其有需豫東二省接濟者  
卽行知圖爾炳阿鶴年隨時撥運總期迅速鳩工疏濬得宜隄防  
鞏固於運道民生兩有神益以副朕慎重河防至意○免江南淮  
安等三府州水災積年民欠○丙寅 上至孫家集閱隄工○命  
建 河神廟○諭軍機大臣等哈達哈唐喀祿等分路帶兵擒剿  
輝特人等唐喀祿擒獲車布登多爾濟並將其屬人剿滅哈達哈  
阿桂僅將普爾普等遊牧收取首賊普爾普德濟特克什克等俱  
已脫逃唐喀祿著交部議敘哈達哈阿桂俱交部議處車布登多  
爾濟等卽派委幹員押解來京其未經拏獲之普爾普等務卽嚴  
加搜捕毋致免脫所有厄魯特屬人等卽照伊等奏請分賞烏梁  
海內大臣察達克等以示鼓勵喀爾喀台吉齊巴克扎克此次甚



屬奮勉著加恩賞戴孔雀翎至投赴克布多地方之業克明安公  
巴桑扎薩克阿布達什克什克特等原非輝特族類且並無背叛  
情形著交與車布登扎布派人管理令其自備資斧遷至通肯呼  
裕爾地方居住○諭昨納穆扎爾奏齊木齊格特人等聞領兵往  
拏之信俱逃避呼倫貝爾等處地方伊等領兵追擒朕亦降旨令  
黑龍江將軍綽勒多等嚴行查辦此事即可完竣北路科布多地  
方關緊要哈達哈在彼駐紮聞輝特人等背叛情形領兵往擒  
而首犯已皆脫逃殊屬疏忽著傳諭納穆扎爾即將齊木齊格特  
人等事務交與同往之喀爾喀王巴雅爾什第等上緊查辦伊等  
速赴科布多籌辦事務俟納穆扎爾到日哈達哈即回至烏里雅  
蘇台辦事○雲貴總督恆文祿事解任命劉統勳往鞫之以德爾  
敏接辦徐州石工○丁卯 上至荆山橋韓莊閘閱工○命江蘇

再截留漕糧十萬石備賑○戊辰諭軍機大臣等今日朕發自徐州有河南夏邑民人張欽遮道奏稱上年夏邑實在被災而地方官所辦不實有以多報少之弊等語前據彭家屏陳奏已令該撫查勘加恩賑恤而尙有以辦理不實爲言者或刁民見朕屢次加恩遂爲無厭之請此等刁風斷不可長已有旨將張欽交鶴年解交該撫照例辦理但恐該縣料理實未妥協著交圖爾炳阿再行詳加查察飭令實心辦理朕昨至徐州見該處情形災黎實堪憫惻夏邑毗連徐郡若仍照例開徵民力益爲拮据所有本年應徵新舊地丁錢糧著酌量分別緩徵見在加賑之地固所當緩卽與災地接近者亦屬食貧之區應酌量緩徵著該撫速行查奏辦理以紓民力○己巳減山東海豐縣屬黎敬等五莊糧額則並免十一年至二十年逋賦○庚午諭軍機大臣等昨夏邑民張欽以地

方官查災不實遮道陳奏已交圖爾炳阿查辦今日經過鄒縣復有夏邑民劉元德以該縣散賑不實前來陳訴地方被災有輕重則加賑自有等差其閒酌籌散給原非一例均施漫無區別如果州縣官辦理不善以致向隅亦當靜聽該管上司查參何得引類越疆連日瀆訴且兩人並係夏邑民人此必有刁徒從中主使不可不嚴加懲究見據供稱商同具詞給與盤費令其前來控告者有生員段昌緒武生劉東震二人看來此外恐尙有人爲之倡率已有旨令侍衛成林押帶該犯交圖爾炳阿嚴審具奏至該縣辦理果否未盡妥協以致災黎有未霑實惠之處該撫亦當留心從容查辦此時不必卽行參奏以長刁風著將此一併傳諭知之○諭據總管內務府衙門奏本月初七日定太妃薨逝朕心深爲憫悼著派皇子等往奠朕抵京後尙擬親往太妃壽躋百齡實

爲世所罕有今茲薨逝在履親王固宜哀慟然王已暮年時方炎暑宜少節哀毋過於傷毀至該衙門奏 太妃一切應備辦之物除王府所備外如有不敷著交該處備辦等語殊不明晰 太妃之事自應動用官物著照 懿密太妃之例辦理留京王大臣等照朕旨遵行○辛未 上至闕里釋奠 先師孔子○諭莊有恭辦理朱瞻贖罪外結一案朕初披閱時覺其顯有情弊豈有入人死罪不行奏聞擅自飭司收贖離任後始含糊具奏者乎莊有恭又非不能辦事之人何背謬乖舛若此是以降旨令尹繼善查辦尹繼善既經莊有恭告知在存心公正者卽應據實參奏請旨察議否則正言阻止莊有恭自不敢視爲泛常縱意手滑致干重辟及奉到朕旨尹繼善亦當備述前情一面速爲辦理乃遲回觀望希圖模稜了事經朕屢行飭催並降旨將莊有恭革職拏問始稱

原曾與聞是莊有恭之情罪尹繼善實有以縱之且釀成其事始終皆由於尹繼善所議將尹繼善交部嚴加議處甚是莊有恭簡任巡撫辦理地方案件自有憲典可遵乃惟以重罰爲事自朱昉一案而外如張穀孫之聯號嚴疑裕之鬪蟋蟀不一而足其意以爲行之既熟將來自可操縱由己莊有恭自應按律治罪然此案則實無贓私入己情弊著從寬免死發往軍臺效力伊見有母喪仍加恩准其回籍料理事畢後前往軍臺不准捐贖許松佖身爲臬司刑名是其專責乃惟事迎合上司意見毫無可否趙西承審之時示意朱昉附會逢迎其在蘇州府任內倚恃巡撫聲名甚屬不堪二人所擬杖流不足蔽辜俱著發往軍臺效力許松佖年已垂老如情願捐贖罪兵部照例查辦請旨趙西不准捐贖朕辦理諸臣情罪一秉至公輕重權衡惟悉視其人自取毫無成見於

其閒也○癸酉 上奉 皇太后駐蹕靈巖遵 懿旨以 北郊

大祀在邇於次日回鑾派簡親王奇通阿等統率官兵扈從 皇

太后營盤行走○命史貽直仍以文淵閣大學士兼吏部尚書○

丁丑諭軍機大臣等逆匪噶勒藏多爾濟見在懾於兵威或由阿

勒坦額默勒庫隴癸山嶺等處逃出入哈薩克或如達瓦齊逃奔

回地均未可定成衮扎布等宜派兵往截哈薩克之路並恐投奔

回部可速飭五十六扎倫泰令其帶領沙呢雅斯赴葉爾羌喀什

噶爾見兩和卓木時著明白曉諭協力查拏擒獻不可容留大兵

不日卽至爾等毋爲臨時之悔至準噶爾喇嘛斷不可信朕前降

旨尙欲設立庫倫張興黃教今準噶爾等作孽深重福澤已盡不

過將此內去年未曾助惡之喇嘛查出留其性命解送來京斷不

可仍前庫倫錫喀堪布等名號擇年老不滋事端之人酌量補放

總管等官令其管轄亦不必仍前留其鄂拓克補放率桑名號也  
○戊寅定外省 山川壇於春秋仲月戊日致祭○己卯諭河南  
夏邑商邱永城虞城四縣上年秋被水災前於彭家屏接駕召見  
時詢問地方情形始據奏及隨召圖爾炳阿質問則奏稱並不成  
災朕特旨令圖爾炳阿帶彭家屏同往查勘如果被災實重應需  
賑濟斷不可稍存迴護乃該撫覆奏僅稱一二低窪地畝閒有積  
水餘俱有六七分收成可以不必給賑酌量借糶兼行已足接濟  
經朕降旨特行加賑彼時已恐該撫之不免於迴護矣及朕至徐  
州閱視河工所見貧黎鳩形鵠面因憶夏邑等縣與江南山東接  
壤其被災村莊不知若何爲之惻然動念隨遣步軍統領衙門員  
外觀音保微服前往密行訪查則該四邑連歲未登積歉已久災  
地未涸未種者居多窮黎景況更有不堪入目者並於彼處收買

童男二人纔用錢四五百文耳持券回奏不勝憫駭爲吾赤子而使骨肉不相顧至此尙忍言耶夫水旱災傷爲地方第一要務朕宵旰勤求時深軫念見如江南之淮徐等各府屬山東之濟甯各州縣雖據各督撫查報照例辦理而凡可以議蠲議賑加恩撫綏之處無不曲加體察破格施恩乃圖爾炳阿初旣不據實奏報及命往查勘又復有意諱飾以致四邑災民流離失所深負朕復加擢用委任封疆之意從前彭家屏面奏時朕猶以彭家屏爲本地搢紳不免有心邀譽鄉里言之過甚今據觀音保所奏則彭家屏出自目擊身親而圖爾炳阿之玩視民瘼始終怙過亦殊不料其竟至於此也圖爾炳阿著革職發往烏里雅蘇台軍營自備資斧效力贖罪以爲地方諱災者之戒真邑永城二縣知縣俱著革職拏問其虞城商邱二縣如應行參處卽著鶴年一併參奏拏問該



管道府俱著查參議處劉慥身爲藩司查辦災賑是其專責乃不行據實入告其於一切賑恤事務又不能董率屬員實心經理遺漏者多著交部嚴加察議河南巡撫員缺著蔣炳調補所遺湖南巡撫員缺著阿思哈補授蔣炳未到任之前河南巡撫印務著劉慥暫行護理夏邑縣知縣員缺著山東鉅野縣知縣羅士昂調補速赴新任鉅野縣知縣員缺著該撫於通省知縣內揀選一員調補其永城縣員缺著方觀承於直省知縣內選員前往補授見在該四縣饑民應如何賑恤著山東巡撫鶴年由查勘荆山橋河工之便就近迅卽前往督率劉慥妥速查辦善爲撫綏並傳諭各百姓等俾共曉然於朕惠愛黎元痾瘝一體之意各安本分靜候給賑至巡撫知縣之罷斥乃朕遣人密加訪察自爲整飭官方起見初不因彭家屏之奏亦不因一二刁民之遮道呈訴也若因此遂

致增長刁風挾制官長擾及賑務則是自干罪戾不能承受國家  
惠養之恩矣彭家屏所述召見奏對之語及與圖爾炳阿面奉諭  
旨一併宣示知之○庚辰免河南夏邑等四縣逋賦○辛巳諭河  
南夏邑等縣被災一事初因詢問彭家屏特命該撫同往查勘復  
降旨加賑及巡省至徐時目擊彼地災黎情形因思夏邑等縣與  
徐沛接壤豈其無災適有夏邑民人張欽告賑恤不周者復爲惻  
然動念密遣司員觀音保前往查訪得實是以將圖爾炳阿革職  
發往軍營效力道府以次議處夏邑永城二縣知縣俱革職拏問  
所以深爲地方官玩視民瘼之戒也比觀音保未回之先復有夏  
邑民人劉元德遮道陳訴並稱縣令不職乞易賢而愛民者朕卽  
知其必有指使之人矣親加詢問供出生員段昌緒武生劉東震  
主謀指使因令侍衛成林帶往豫省會同該撫查訊今據成林回

奏至夏邑時令該縣差提段昌緒等竟抗不到案知縣孫默親往查拏乃於段昌緒臥室中搜出逆犯吳三桂偽檄一紙呈覽並稱尚有指使數人控訴者聞責劉元德而散去閱其偽檄則皆毀謗本朝之言極其悖逆段昌緒爲之濃圈密點加評贊賞見者無不髮指夫吳逆之檄不過曹操司馬懿之作爲耳國家撫臨中夏百有餘年薄海生民世受渥澤無論我列祖列宗厚德深仁自古未有卽朕卽位以來二十餘年惟日兢兢時以愛養百姓爲念偶遇水旱偏災蠲賑所施動逾數千百萬此內外臣民所共知共見而朕撫衷自問實可以上對天地祖宗下對羣黎百姓以爲天下之人具有天良必應革薄從忠卽邇來辦理夏邑四縣之事亦足使頑民知感而乃有喪心毒惡之徒於此等偽檄竟忍鈔錄收藏動筆批閱稱贊朕實爲之寒心夫地方被災封疆大吏不

能據實查辦自有應得之罪然百姓中有如此悖逆之人滅絕倫  
紀居心叵測至此自足上千天和災祲之來實由自召若使觀音  
保早回數日則劉元德之遮訴朕亦不加深究必不更遣成林往  
豫而段昌緒之事早致漏網矣豈非此等悖逆之蹟實爲天理所  
不容冥冥之中亟欲使之敗露故有不知其然而然者而暨不畏  
死之徒亦應知戒矣朕從前降旨治圖爾炳阿等之罪原因諱災  
今經辦出逆檄一事是緝邪之功大諱災之罪小且以如此梗不  
知化之人指使控訴欲去其縣令而卽爲之治其司牧者以罪是  
不益長刁風乎圖爾炳阿不必革職著仍留河南巡撫之任夏邑  
縣知縣孫默能查出此事尙屬能辦事之員並永城縣知縣俱免  
其革職拏問各仍留原任所有前降革職及調任各諭旨俱不必  
行其諱災處分仍著交部分別照例察議至收藏偽檄乃出自識

字之人原與農民無涉朕不忍因此數人忽視災黎令其失所其四邑災務仍著方觀承會同圖爾炳阿妥協查辦圖爾炳阿因有前此罷斥之旨遂心存成見有不能釋然於災民者則是自取罪戾亦斷不能逃朕之洞鑒也但段昌緒家既有此書傳鈔何自此外必尚有收存卽彭家屏家恐亦不能保其必無卽應委大員前往伊家嚴行詳查並著方觀承前往會同圖爾炳阿查辦此所關於人心風俗者甚大該督撫等務宜逐一根究按律定擬以伸憲典不可草率了事朕辦理政務毫無成見其賞罰權衡惟隨時順應用協乎情理之至當耳並將此通行曉諭知之○諭軍機大臣等輝特賊人德濟特克什克等懼罪逃竄經官兵分道擒拏俱已弋獲察達克感戴朕恩奮勇效力深堪嘉予前已授爲內大臣著加恩將伊子塔斯呼勒補授藍翎侍衛並賞段六端茶葉二十封

圖布慎赤倫洪郭爾等亦各著有勞績如有未經賞翎者准其戴翎並各賞段五端茶葉十五封扎薩克台吉齊巴克扎布著賞給公品級頭等台吉德勒克丕勒索倫佐領瓦齊爾等俱著賞給孔雀翎以示獎勵其首告車布登多爾濟潛通阿逆之厄魯特尼瑪根敦扎布及遣赴軍營報信之阿齊俟伊等到京酌量加恩所有尼瑪根敦扎布阿齊等親屬戶口俱著編入察哈爾旗分安插哈達哈阿桂前因疏縱首賊飭部分別議處今既經擒獲著加恩寬免○哈達哈等奏厄魯特尼瑪原係阿睦爾撒納之兄沙克都爾宰桑因阿逆謀害沙克都爾尼瑪逃避伊犁上年參贊大臣富德進兵時因其熟悉哈薩克地方帶往嚮導與其子們都行走甚勤是以令歸入車布登多爾濟游牧居住此次首告車布登多爾濟潛通阿逆之事尼瑪根敦多布等公同商議遣阿齊赴軍營報知

臣等倉卒帶兵尼瑪被擒聲訴緣由始行釋放是以將伊妻孥等五十一名存留並將尼瑪同車布登多爾濟等解送京師以備質對報聞○壬午命鄉試二場照會試例改表爲詩○甲申准直省將軍提督年逾七十不能乘馬者具奏請旨○乙酉前據禮部奏請暹羅國使臣於回鑾時在黃新莊引見今日王大臣等至涿州接駕召問何國宗則奏稱交伍齡安介福帶領此在京禮部堂官奏請之事而乃以專諉之隨駕之伍齡安介福二人是誠何心若謂恐有遲誤則黃新莊乃明日駐蹕之地不至趨赴不及其意不過以涿州接駕後即可回京若次日仍須帶領暹羅國使臣未免又需信宿耳朕南巡江浙復親臨徐州閱視河工往返三四閱月伊旣不列扈從安居在京而乃憚此一二日之勞惜此一二金之費歸家惟恐不速不以衙門公事爲重似此存心卑鄙亦奚以勝

尙書之任表率朝列耶何國宗本屬庸才前因禮部尙書缺出一時不得其人棄瑕錄用今於奏對時觀其龍鍾顛倒仍照原得處分著革任金德瑛徐以烜身爲卿貳亦係應行帶領之人一切聽之何國宗隨同附和亦屬不合俱著交部嚴察議奏○丙戌諭前因莊有恭在江蘇巡撫任內濫行批罰贖罪已將莊有恭及附和迎合之許松佶趙酉革職治罪矣以江蘇一省莊有恭一人任內言之已有數案則各省督撫恐亦俱所不免謂必如莊有恭所辦朱聘一案以續首重罪不題不奏擅行准贖在各督撫中自必不敢出此至嚴凝裕闕蟋蟀等細微之事量爲批罰完結者自屬勢所易行夫立法所以示懲應的決者自應照例的決州縣濫罰尙所嚴禁況於督撫大吏耶嗣後民間詞訟案件槩不得濫行准罰若果所犯之罪本輕而爲富不仁情實可惡則酌量示罰以充地



方橋道廟宇等工之用亦尙可准但須奏明請旨不許擅自批結以杜藉端影射之弊此亦肅清吏治之一端也○丁亥 上還京師○戊子諭朕省方所至疇咨民瘼河南夏邑等縣被災一事初因詢問彭家屏特命該撫會同查勘降旨加賑及巡省至徐有夏邑民人張欽告賑恤不周者復爲密遣司員前往察訪一經得實卽將巡撫革職該地方官分別懲治前後諭旨已共聞共見今日召見九卿科道卽彭家屏所自行敘述之處朕愛養黎元之本心於彭家屏不惟不疑其過甚且聽從保護成全之朕固無負於此方百姓更無負於彭家屏也嗣因復有夏邑民人劉元德遮道陳訴則又供出生員段昌緒等主謀指使經該縣於段昌緒家搜出逆犯吳三桂偽檄一紙該處既有此等喪心之徒忍將偽檄鈔錄贊賞則其風俗人心之敝壞已可槩見傳鈔所及卽彭家屏家亦

安能保其必無耶因命方觀承前往查辦而召彭家屏至京面詢亦以彭家屏係久列大員世受國恩之人若自首出尚可開一縫之路乃據稱吳三桂偽檄實未寓目再三詰問但稱有明末野史等類存留未燒實不會看等語既云未看何以卽知其不當存留天下豈有止見一書之名目而遂曉然其爲何等書者乎人家藏書固不能徧閱但旣知爲不當存留之書而又故爲藏匿是誠何心豈必如段昌緒之批閱偽檄始爲上千憲典耶夫本地搢紳遇有地方公務主持教唆已屬越俎多事然其過猶小若於名義所關稍有干犯則其罪更大彭家屏身爲大員非尋常愚民劣衿可比今在朕前廷質之下情詞閃爍顯係狡飾彭家屏著革職拏問俟方觀承等查奏到日審明按律治罪將此通行曉諭知之○己丑兆惠等奏臣等領兵至呼圖畢探知尼瑪慙懣扎那噶爾布襲

殺噶勒藏多爾濟及其親屬人等扎那噶爾布卽往博囉塔拉坐  
台吉牀而尼瑪又欲害扎那噶爾布往迎阿逆令其管理準噶爾  
地方見在扎那噶爾布自安濟海起行未久等語此際迅速追擒  
不難弋獲應先派兵數百繞出前途邀截夾攻方不虞漏網隨行  
文富德等豫爲堵截續據富德咨稱總管端濟布等先至瑪納斯  
地方生擒得木齊鄂羅斯並收獲男女三百餘人詢知扎那噶爾  
布移往博囉塔拉尼瑪移往珠勒都斯扎哈沁遊牧移往濟爾哈  
朗賊人蹤迹見已偵探確實臣等惟有乘其內亂奮力進剿報聞  
○以歸宣光爲禮部尙書王興吾爲吏部侍郎由江西布政使遷○庚寅  
上詣 定太妃喪次致奠○諭兆惠富德等前後奏到阿逆與  
哈薩克不睦回至準噶爾搶掠扎那噶爾布游牧富德帶兵追襲  
剿滅賊黨甚眾阿逆不敢迎敵望風而遁追至噶順地方遣兵豫

堵逃入俄羅斯去路兆惠亦卽領兵同追等語此次兆惠富德奮勇追捕俱協機宜但兆惠所奏整頓後隊兵丁先辦哈丹等遊牧事竣再同將軍成袞扎布併力辦理等語尙屬未協見在兩路分兵前進特爲勦滅厄魯特賊眾若豫知阿逆前來則當併爲一隊方合機宜今蒙 上天眷佑使賊自投天網適遇大兵理應先擒首賊其厄魯特等皆可從容辦理著卽傳諭成袞扎布等兩路大兵剋期會合務躡阿逆逃竄蹤迹併力擒獲並傳諭眾厄魯特等有擒獻阿逆者不特寬宥其罪更當加以重賞反復開導令伊等擒賊自效以贖前愆至阿逆逃竄之路不過哈薩克俄羅斯二處如逃入俄羅斯則自可申明成例向彼索取若哈薩克旣與阿逆不睦將軍等領兵赴彼曉諭利害自必速爲擒獻成袞扎布等遇此機會務宜奮勇辦理迅奏膚功

五月甲午諭准徐河道向兼分巡後因專設巡道地方各官遂以非河道管轄遇雇夫搶險等事每致呼應不靈嗣後伏秋大汛辦料雇夫該地方官著仍聽准徐河道調遣毋得歧視以重河防○丙申諭車布登扎布等遣員押解逆賊青滾雜卜幼子巴里及伊媳二人來京伊等皆係逆賊親屬律應正法第念青滾雜卜祖母原封貝勒博貝之妻巴勒津年逾八旬孤苦無依博貝亦曾著勞績不忍令其絕嗣著加恩將巴里等免其正法仍著車布登扎布傳諭巴勒津如情願赴京即將伊孫及孫媳等交伊同住以示格外優恤之意○丁酉 上詣藍靛廠恭迎 皇太后鑾輿居暢春園○戊戌諭軍機大臣等前據彭家屏供出伊家舊有明末野史等書開具名目是以令三泰前往查取今據三泰回奏布政使劉慥已於四月二十六等日往彭家屏家查辦家產有衣物四十餘

箱書籍未經查閱三泰至彼徧查並無前項所開書籍等語前因  
段昌緒家中搜出吳逆偽檄彭家屏係伊同縣未必無此等鈔存  
逆蹟是以命方觀承往夏邑查辦如已在彭家屏家中搜出逆書  
則查辦家產自不待言不知劉慥前往時係出自己意抑方觀承  
囑爾炳阿令伊前往是否搜出悖逆書籍若未經搜出而遽先查  
什物衣裝則全不知輕重辦理殊謬至所開明末野史諸書並不  
由他人首告乃彭家屏親自供出自必伊家所有何至全無蹤迹  
彭家屏之子雖在歸德府三泰亦可就近會同圖爾炳阿嚴行追  
訊伊家人眾多俱可隔別研究務得實在藏匿處所乃遂交與圖  
爾炳阿而三泰輒自先回亦屬錯謬已令三泰復往會同查辦可  
傳諭方觀承圖爾炳阿將伊子及家人嚴行審訊明白開導令知  
係彭家屏親自供出無可狡賴速行據實呈出尙有可寬之路如

堅執不認卽當照律緣坐立行正法不能爲伊寬貸也○禮部議  
准御史劉宗魏奏直省鄉試內簾向無內收掌官請添設一員於  
舉貢正途出身之佐貳選用從之○以湯聘爲江西布政使楊纘  
緒爲陝西按察使由浙江金甯嚴道遷○辛丑諭朕此次南巡親莅河工相  
度險要指授在工諸臣並特派侍郎夢麟會同總河白鍾山疏荆  
山橋一帶總河張師載巡撫高晉協辦徐州府黃河兩岸隄工其  
徐州護城石工則委之副都御史德爾敏下河諸工則委之副總  
河嵇璜六塘河以下各工復委之侍郎夢麟分任責成各有專屬  
凡以爲積歲被災羣黎籌疏洩之方捍禦之策者宵旰靡甯冀收  
實濟業經屢頒明旨矣近據山東巡撫鶴年奏報山東之金鄉魚  
臺等州縣未涸地畝尙有一千餘莊因思此方積潦再經伏雨秋  
霖將益苦汎溢而上江之宿虹靈璧等處河南之永城夏邑等處

在在皆有積水計漫淹地界不下數百里此其受病非一朝一夕  
驟致蔓延蓋其始皆由於地方官漫不經心偶遇水災不亟爲籌  
度日復一日因循釀害積水日益增淹地日益廣以致高下田廬  
盡成巨浸及至受害既深自非大動帑項厚資工力不能奏效而  
大小各官又莫能深悉受害之由確得祛患之術惟恐議疏議築  
虧帑貽累遂爾噤口束手坐視其民爲魚而莫展一籌今水患已  
不可勝言若不及時徹底籌辦將來其何所底止耶此亦朕南巡  
未了之事著侍郎裘曰修馳驛前往山東河南上江見在積水各  
州縣往來周視寬以時日熟察情形諮詢輿論勿憚再三其在山  
東者與鶴年會商在河南者與圖爾炳阿會商在上江者與高晉  
會商其地方官有熟悉水道之員聽其酌量差委務在通盤籌算  
無分疆域凡可以登民衽席計安全而謀樂利果歸實用毋惜多



費帑金朕痼瘵一體兩顧嗚咨展轉憂勤之意皆諸臣所共悉其深體而共勉之以副委任○諭據方觀承等奏審訊劉元德告賑一摺內稱彭家屏接駕回縣輒言此番恩賑由伊陳奏而得家人佃戶復在外張揚遂致劉元德司爲政等妄生覬覦其呈詞伊姪彭型曾轉送閱看彭家屏已屬知情請革職審擬等語方觀承等所辨非是夏邑永城等縣水災原因彭家屏陳奏朕始得聞知是以初令圖爾炳阿查明賑恤時卽令彭家屏同往蓋地方遇有災傷巡撫旣諱災不報而本地鄉宦能以實情入告此正能體朕懷保小民惟恐失所之意朕所嘉予至劉元德妄行叩關究出指使之生員段昌緒卽於伊家中搜出吳逆僞檄因思該地方風俗敗壞泯絕天良恐藏匿者不一而足爰命方觀承等前往查辦而召九卿面詢彭家屏彭家屏卽供出有鈔存明末野史等書三種夫

使此三書中果有悖逆詆毀之言而以厯官方面受恩數十年之大吏忍於鈔錄存留其罪尙容誅乎卽使指使劉元德叩閭屬實而主使之罪輕收藏逆書之罪重若僅如方觀承等摺中所奏則彭家屏本係朕差令與該撫同往查災者卽使邀譽鄉井亦人情所必有何足爲罪若以此治罪使陰懷誹背本朝之輩謂因告災罹譴反得藉口而民隱無由上達亦非朕廣諮博訪憂勞勤恤之本意也明末野史等書乃彭家屏親筆開出書名具有來厯何以並未查出該督等不詳究收藏逆書實蹟專以劉元德控告一節定彭家屏罪案殊失輕重之宜至搜出往來書札內有請託干求尤其末節更不必問矣原摺著發還○諭軍機大臣等前因彭家屏供出家藏有明末野史潞河紀聞日本乞師豫變紀略等書續又供出酌中志南遷錄並鈔本小字書係天啓崇禎年間政事等

書以上各種該督等何並未查出一種甚屬草率著將供出書目並寄該督等逐一詳細查明具奏尋奏段昌緒所鈔逆檄由司存存給而司存存鈔自司淑信司淑信得自己故郭芳尋家此外實無傳鈔之人至彭家屏家書籍查出明季豫變紀略刻本其餘日本乞師等書據彭家屏之子彭傳笏供稱於四月十六日間段昌緒有逆書之信查閱家中書籍見有明末鈔本等書恐有違礙未暇檢閱槩行燒毀等語查彭傳笏燒毀各書係出己意抑係彭家屏傳信及得書來歷均須對質明確除段昌緒等按律定擬外請將彭傳笏等交部嚴訊得旨細閱供單爾等不無將就了事之意著將人犯交方觀承親帶至京請旨○壬寅諭軍機大臣等據兆惠奏巴圖魯侍衛奇徹布等追趕阿逆至古爾班呼斯坦地方擒獲宰桑巴桑及阿逆所差得木齊普爾普得木齊達瓦護衛蘇珠

克圖據供阿逆並未至此帶領達什車凌賽齊喇呼等四十人由  
欽達蘭嶺北前往巴爾達穆特游牧地方見在富德奇徹布等簡  
練兵馬赴阿逆逃竄處所追剿等語兆惠何不急速接應富德往  
擒阿逆阿睦爾撒納係要緊正犯若乘此機會拏獲諸事皆易於  
辦理其餘事件卽稍爲稽遲無關緊要又兆惠摺內稱扎那噶爾  
布差人令克喀特烏嚕特人等尾隨大兵搶掠臺站等語朕已諭  
交將軍成衮扎布等令其酌量發兵剿辦卽照所奏於烏嚕木齊  
安濟海托多克地方安設三大臺站亦妥但此次搶掠臺站不過  
大兵經過剿剩竄匪與瑪哈沁之厄魯特行竊而已未必係大夥  
賊眾故昨經阿里衮奏到此事朕卽降旨令阿里衮帶兵照料臺  
站今兆惠亦派兵令巴圖魯侍衛奎瑪岱前往接應搜剿餘匪並  
藏匿之瑪哈沁等想臺站一帶皆已安靖卽宜照舊安設臺站驛

遞始能迅速兆惠等辦理驛遞務期迅速再巴罕庫蘇臺站筆帖式塔克什哈遇賊打仗身受多傷理宜加恩但塔克什哈與賊打仗後宜仍在本臺駐紮乃伊並不在本臺帶領餘眾前赴圖古哩克台殊屬怯懦若仍復加恩恐別臺站人等效尤竟將臺站遷移必致誤事塔克什哈著以功抵罪仍留於臺站效力英善身受重傷逃出殊屬可憫除仍留千總職銜在軍營效力外仍加恩賞給銀兩鄂博什帶兵前赴額爾齊斯之那林布魯勒等處路遇庫圖齊訥爾宰桑鄂勒錐等三十餘戶皆經勦殺殊屬奮勉著交兆惠將鄂博什及隨行官兵並陣亡之委署驍騎校外蘭保等查明職名俟大功歲後一併送部議敘○諭昨據成衮扎布奏巴圖爾烏巴什等欲擒阿逆呈獻今據兆惠奏巴圖爾烏巴什自稱係噶爾丹策零之婿帶領集賽人等前往伊犁等語前後所奏情節不同

著將兆惠摺錄寄成袞扎布閱看伊等兩路大兵自當會合卽確探阿逆逃竄處所奮勇擒拏毋致疏縱巴圖爾烏巴什旣前往伊犁必與大兵相遇成袞扎布卽詳察情形辦理不得因其有擒賊自效之言輒行寬縱如果擒獻阿逆卽遵照昨降諭旨令其遷移內地斟酌辦理再兆惠摺內稱扎那噶爾布等煽惑克喀特烏嚕特各鄂拓克令尾隨大兵之後搶掠臺站等語克喀特烏嚕特等俱在珠勒都斯一帶遊牧並著成袞扎布就近發兵先行剿滅○癸卯諭軍機大臣等昨據兆惠奏阿逆窮竄情形自可計日就俘惟左右哈薩克地方應豫行遣人曉諭已降旨令成袞扎布等遣員赴阿布賚處開示利害令其擒獻三等侍衛布袞藍翎明嘉薩爾熟悉彼處情形著馳驛前往軍營交與成袞扎布等選派侍衛數員帶領前往阿布賚有欲圖阿逆之意此時未必再行逃往其

石部哈薩克特柳克或尙容留阿逆亦未可定第遣員徑赴石部  
哈薩克恐伊等墮入賊計飾詞容隱著布袞等先赴阿布賚遊牧  
明白曉諭卽令阿布賚遣人同往石部俾知阿逆反覆無常斷難  
容留致貽後悔仍諭以天朝威德如果擒獻自當格外加恩一面  
帶兵前往索取成袞扎布等務宜妥協辦理又兆惠奏稱喀喇沁  
鄂勒哲依之子敦多克戕殺伊父同土爾扈特舍楞遷往庫克烏  
蘇喀喇塔拉等語敦多克情罪可惡大兵到彼務卽拏解來京毋  
得任其免脫○丙午成袞扎布等奏臣等聞烏嚕特宰桑錫克錫  
爾格有擒阿逆自效情形遣烏嚕特得木齊濟木巴等傳錫克錫  
爾格前來詎錫克錫爾格潛通阿逆竟將濟木巴等看守臣等卽  
派兵三百名交總管溫布侍衛老格等往擒復曉諭濟木巴等擒  
獻錫克錫爾格隨據濟木巴及孟克濟爾噶勒羅布寨巴顏哈什

哈等四人戕害錫克錫爾格及錫克錫爾格母妻幼子家屬人等請授濟木巴爲總管孟克濟爾噶勒爲副總管其應帶往軍營者酌量帶往得旨宰桑錫克錫爾格已爲其屬人所殺成衮扎布等卽將濟木巴等分別授爲總管副總管尙屬妥協惟是厄魯特等生性兇殘互相戕賊斷不可少事姑息前命將軍等進剿各鄂拓克時務將賊眾剿滅其餘老幼人等暫行安撫擇其人尙可信者授爲總管副總管以資約束不得照從前留各鄂拓克舊名仍授爲宰桑收楞額等名目屢次降旨甚明今成衮扎布等所奏原不過一時暫爲權宜事竣仍當分別辦理卽如錫克錫爾格詭稱帶兵擒獻阿逆乃反與阿逆同謀情罪可惡今雖爲其屬人所殺而濟木巴等又安能保其不生他變成衮扎布等務宜加意防範稍有可疑卽行正法至見在軍營之三都克令其回至遊牧辦理亦



安仍須留心緝察果否實心效力毋墮奸計○丁未諭軍機大臣等成衮扎布等奏聞回人霍集占等擾亂戕害副都統阿敏道俟大兵至伊犁卽前往回城剿滅等語所奏非是此次進兵專爲剿滅厄魯特賊眾其回部事宜俟蕩平伊犁之後原可從容辦理至於擒拏阿逆原議定明歲再行進兵豈料阿逆自投羅網由哈薩克逃回適遇大兵擊敗率眾數十人奔竄此正機會可乘時不宜失見在兩路大兵應已會合卽當極力搜捕明正典刑其餘賊眾尙可徐徐辦理何論回人縱回人妄逞鴟張俟平定厄魯特後再行辦理亦有何難成衮扎布等所奏殊不識事體輕重若以阿逆逃竄之路正係兆惠等進兵地方竟委其事於兆惠而伊等以專辦回部自任尤屬非是見在富德等領兵追擒阿逆兆惠遠巡未進朕尙屢次切責若兩路大兵互分彼此更豈朕簡用之意成衮

扎布幼習軍旅自能奮勇爭先此等意見必出自舒赫德伊赴軍營時朕訓誡至再至三何得遲疑觀望一至於此且見在阿逆情形與上年迥不相同伊前與阿布賚交結甚深今已成嫌隙勢不能再行逃往至右部哈薩克特柳克之容留與否尙在未定且上年策楞等帶兵追擒並未深入伊料此次大兵亦復如是必潛身於險僻處所苟延殘喘俟大兵撤回仍復竄入勢所必然此時惟確探逆賊逃竄處所派富德等帶領精兵多給馬匹務期徹底搜捕擒拏首惡以彰國憲其餘眾不必卽行辦理至霍集占使人沙呢雅斯已派員送還回部如恐其洩漏軍情則卽行正法其五十六托倫泰等亦卽追回毋庸遣至回部成衮扎布等卽遵照妥協辦理○庚戌諭何國宗罷職以來家居無事算法尙伊世學著賞給編修銜在上書房行走

六月辛酉朔諭圖爾炳阿著來京候旨河南巡撫員缺著胡寶琮調補胡寶琮未到任之前著劉懃暫行護理其江西巡撫員缺著阿思哈署理○諭前據郭一裕參奏恆文令屬員買金短發金價巡閱營伍沿途縱容家人收受屬員門禮等款朕以恆文歷任封疆受恩最重當不應至此是以特命劉統勳會同定長前往查察今據劉統勳等奏到恆文買金一事及縱容家人收禮俱屬確實恆文身爲大臣自應潔己率屬乃簠簋不飭一至於此實爲深負朕恩恆文著革職拏問其案內有名之汪筠羅以均等著一併革職嚴審究擬具奏○壬戌諭前據郭一裕參奏恆文各款特命劉統勳會同定長查辦今據奏到買金等事屬實業已降旨將恆文革職拏問但閱供詞內稱購金情節實緣欲購備方物進貢商之郭一裕據云滇省惟金較貴重我擬製金手鐲四箇進貢因今標

員明柱向巡撫衙門領取鑪鐃購金製備等語臣工貢獻前會屢經降旨槩行禁止卽督撫所貢方物不過茗柑食品等物以資賞賜或遇國家大慶間有進書畫玩器慶祝者酌留一二亦以通上下之情而已從未有以金器進貢者使恆文果有金器進到亦必申飭發回況內府何所不有甯藉此芟芟金器爲耶而乃藉詞勒派屬員短價冀圖餘潤以致喧傳閭省殊玷官箴然既有以進貢爲口實者嗣後各省督撫除食品外槩不得絲毫貢獻違者以違制論至恆文歷任封疆豈尙懵於事理其在公正大臣一聞郭一裕進貢金鑪之語卽應據實參奏乃不惟不奏更尤而效之反被所欺是何愚之甚耶但郭一裕旣以進貢金器慫恿總督隨以購金參奏是復何心此雖恆文一面之詞亦不得不根究明悉著劉統勳定長將此情節逐一秉公嚴訊至恆文家人或偶爾需索尙

可諉爲耳目不周乃金銀贓物計值累千是其網利營私稔惡盈貫何得僅以失察爲解著一併嚴審具奏○召石柱來京以托穆

齊圖爲廣東布政使明山爲山西按察使

由甘肅甯夏道遷

○癸亥免甘

肅通省二十三年額賦○免河南夏邑等四縣二十三年額賦並命查勘溝道○改直隸遵化薊州二營隸馬蘭鎮○甲子諭軍機大臣等昨劉統勳審訊恆文短發金價縱容家人款蹟屬實已降旨將恆文革職拏問矣恆文身爲大臣藉口進獻勒派屬員短價取利其罪固屬難逭但據恆文供金鑪式揀得之郭一裕見有領取鑪樣之中軍明柱可證等語果如恆文之言則是郭一裕先以鑪式示恆文繼乃以購金參劾又明知金鑪不可進獻必奉嚴飭乃告以今年不進竟似恆文全墮其術中者此乃市井所不爲豈大吏同事一方而竟出此或郭一裕先會製鑪備貢後因恆文紛

紛購金閩省喧傳恐彼此俱致敗露遂不復入進而轉以參劾恆  
文爲先發計亦未可知但恆文之金旣資購買豈郭一裕製鑪之  
金獨不需購買乎其購買屬之何人未進之金鑪何在亦不得因  
係先參遂置之不問若劉統勳等因有此旨又誤會謂因郭一裕  
有鑪不進復加窮詰則更失之遠也總之此二人雖共事日淺未  
必素無嫌怨聞郭一裕所參及恆文所供彼此俱不無構陷挾嫌  
惡習著傳諭劉統勳等務將此中實在情節悉心詳審卽行具奏  
○以愛必達爲雲貴總督調陳宏謀爲江蘇巡撫明德爲陝西巡  
撫定長爲山西巡撫以周琬爲貴州巡撫徐垣爲四川布政使九  
成爲安徽按察使

由山東兗  
沂曹道遷

○乙丑諭軍機大臣等據兆惠等奏

拏獲阿逆宰桑烏巴什供阿逆逃往塔爾巴哈台地方等語此言  
未足憑信宰桑烏巴什乃阿逆最信用之人阿逆被大兵擊敗逃

竄必與烏巴什同行今伊在雅瑪圖地方爲我兵所獲故爲遷就之詞阿逆得以乘閒脫逃均未可定將軍成袞扎布等在伊犁色勒等處加意防緝此際兩路將軍大臣等正在擒拏阿逆無暇辦理餘賊然各處賊匪其量爲安插處仍照常撫慰安插見在歸降人內有出色者或賞戴翎頂或量賞銀段以結其心務宜妥爲辦理此時若阿逆已擒餘賊可隨便辦理如尙未獲我兵遠行資糧接續甚難宜卽撤回或在吐魯番額林哈畢爾噶一帶過冬明歲再行進剿成袞扎布兆惠等於應撤兵時務遵朕訓諭將兩路大兵會合一處乘撤兵之便協力將安插之賊眾熟計確商速爲完結剿辦此皆朕觀伊等所奏情形豫爲籌畫其應如何相機辦理之處在將軍大臣等酌量地方情形辦理斷不可拘泥朕旨此時如得信息速行奏聞○兆惠等奏據侍衛奇微布等拏獲厄魯特

宰桑烏爾古勒濟勒烏魯木等及所屬人取查烏爾古勒濟勒前  
會授散秩大臣後復附和阿逆應卽行正法第據供稱見在博囉  
塔拉地方遊牧阿逆會令同行並未前往尙屬實情此時正在擒  
拏阿逆之時此等賊人似毋庸卽辦仍令在原處遊牧至烏魯木  
從前擒拏唐古忒時曾經效力賞給翎頂今聞大兵前來卽率屬  
數十人投至軍營已令在軍營作嚮導往擒阿逆其屬人亦仍令  
在原處遊牧俟擒拏阿逆後再行分別辦理報聞○丁卯諭軍機  
大臣會同九卿科道等審擬段昌緒彭家屏一案段昌緒鈔錄僞  
檄圈點評贊悖逆已極其罪自不容誅至彭家屏前因段昌緒家  
查出僞檄彼時以該處人心惡劣卽彭家屏家亦不能保其必無  
因降旨嚴查及到京後召九卿科道面詢彭家屏所問者僞檄及  
詆毀悖逆類於僞檄之書耳而彭家屏果供出鈔存明末野史數



種蓋彼時彭家屏意中以朕已查獲伊家中書籍難以狡飾是以據實供認尙冀稍減萬一而伊子不知希圖滅迹先已聞風燒毀若使此數種書中果無悖逆詆毀之言亦何必作此鬼蜮伎倆耶且彭家屏乃李衛門下一走狗耳其性情陰鷲恩怨最爲分明從前每當奏對時於鄂爾泰父子雖未必能比古良臣而較之李衛其爲人平心而論鄂爾泰父子雖未必能比古良臣而較之李衛其相去何啻霄壤是彭家屏之傾險狡詐已可槩見但服官已久小有幹具是以厯加升用伊在藩司中資俸最深而終不畀以封疆重任者蓋恐其乖張自用不獨一省官民胥受其害而伊亦必至重干罪譴正深於保全之意乃伊遂心懷觖望託病曠官今春南巡前來接駕奏及夏邑等縣被災情形朕卽召巡撫圖爾炳阿在伊前面加質責並令其同往查勘其所以不卽治圖爾炳阿諱災

之罪者實以本地薦紳一言遽爲斥一巡撫此風斷不可長而仍諄諄而諭圖爾炳阿不得因此挾嫌借事報復朕之始終成全彭家屏者如此乃前於九卿科道等召對面詢伊云朕降旨於巡撫爲恩待汝乎非恩待汝乎伊但稱皇上大公非爲臣一人且詞色毫不知感此豈非滅絕天良者乎以彭家屏居心觀之則其所鈔藏者自係詆毀悖逆之詞又焉知其不加以批閱評點耶其所供之書俱稱得自崑山徐乾學家此時若逐加根究何難追出原本然蔓引株連獲罪者眾朕所不忍試思本朝撫有中夏厚澤深仁休養生息薄海臣民共享太平之福自漢唐以來實罕與倫比在定鼎之初野史所紀好事之徒造爲荒誕不經之談無足深怪乃迄今食毛踐土百有餘年海內指紳之家自其祖父世受國恩何忍傳寫收藏此實天地鬼神所不容未有不終於敗露者如段昌

緒彭家屏之敗露豈由搜求而得者乎此後臣民中若仍不知悛改消滅天道自必不容令其敗露亦惟隨時治以應得之罪耳彭家屏本應斬決但所藏之書既經燒毀罪疑惟輕著從寬改爲應斬監候秋後處決段昌緒從寬改爲斬決其緣坐妻妾並免其入官爲奴司存存司淑信俱從寬改爲應斬彭傳笏依擬應斬俱著監候秋後處決其彭家屏家產原應入官且伊擁有厚貲田連阡陌而爲富不仁陵虐細民鄉里側目著派侍衛三泰郎中蘇勒德前往查明應入官者卽行入官其房地著加恩酌量留給養贍家口外所餘田畝分賞該處貧民交該撫胡寶瑔妥協辦理並將此通行曉諭知之○戊辰諭河南歸德府所屬之夏邑永城等縣連被水災而該地方官玩視民瘼有心諱匿及降旨賑恤仍不實心經理一任災黎流離失所殊資牧民之任向所以姑留原任者以

該地有不法莠民設法告訐該管官其風實不可長今刁頑者既已除去則良懦者其實可憫該縣官匿災不恤有顧仇其民之心僅予罷斥不足蔽辜夏邑縣知縣孫默著革職拏解刑部治罪永城縣知縣張銓亦著革職交與該撫照例治罪其夏邑縣員缺著觀音保以通判銜管知縣事馳驛赴任永城縣員缺著直隸內邱縣知縣孫爾周調補該督方觀承卽行飭知令其速赴新任該二縣積荒之後民氣凋敝觀音保等其善爲撫綏加意整頓稱朕軫念災地至意○允刑部侍郎蔡新回籍終養○己巳諭軍機大臣等愛必達已有旨用爲雲貴總督江蘇巡撫員缺以陳宏謀調補矣陳宏謀自陝赴江尙需時日督撫事務自應尹繼善一人兼辦但伊平日爲人專以模稜了事此是其一生受病處誠諭丁甯幾於舌敝總未痛加湔洗卽如地方災務先事而厚費圖之使不致

受災伊輒慮徒費無益必不肯爲甯待其成災而請賑不知有災而賑卽辦理極其妥協究不若無災而得中歲百姓爲能自樂其生今年年疏築年年蠲賑民間田畝甫涸旋淹終無了期有司不勝其勞而蒼黎不勝其苦所費動盈鉅萬所得糴及升斗則與其賑之被災之後何如籌之未災之先卽以所費計之亦不當如此何況爲民司牧於心誠何忍耶尹繼善熟悉情形於淮徐各屬積年被災之處何以使永弭水患但有善策卽經理數年寬其時日多費帑金朕所不惜若但模稜了事豈不孤負江南百姓稱頌之美名耶目下徐州一帶積水未盡消涸而窪地又以多雨被潦卽設法宣洩果能速消不誤秋禾否江蘇各屬望雨甚殷今已六月初旬矣會已得有透雨澤否近日情形若何一併卽速馳奏以慰軫念○庚午諭今日召對西安布政使劉藻據奏盧焯在西安巡

撫任內遇有進貢方物止量給薄值實皆派辦及調任湖北向借庫銀一千兩未曾應付等語盧焯乃獲罪廢斥之員朕念伊尙係舊人加恩錄用適因一時乏人令以京卿署理撫篆旋復實授理宜感激朕恩勉圖報效不意其卑鄙性成不知悔改尙復如此督撫進貢一事朕屢經降旨停止槩不得有所進獻其各省方物不過柑茗香屑之屬以備賚予此則伊古有之不在禁例從前皇考世宗憲皇帝時覈定督撫養廉洞悉下情是以從優賞給諭旨中亦屢及此此與發價令伊等承買何異伊等每年所貢方物幾何原可從容備辦卽不備辦亦不强也乃以此爲囊橐中物專已自封而又藉進獻之名派累所屬爲漁利計甯屬員之養廉顧爲資助督撫設耶因問及陳宏謀據劉藻云伊辦貢皆出自養廉如數給發是可見鄙吝之與自好存乎其人嗣後督撫各宜自量如

以養廉自辦毫無累及所屬循例可也藉曰不能則如勿進若如  
盧焯及近日恆文之藉口自肥則斷不可督撫之優劣自由績效  
於進獻毫無干涉此亦天下所共知者而旁人之指摘議論必不  
可掩彼受派累者不且怨及君上耶至庫項絲毫均關國帑乃竟  
欲私相授受公然向藩司借貸其罪更不待言矣盧焯深負朕恩  
著革職發往巴里坤效力贖罪並將此通行傳諭知之又諭盧焯  
已有旨革職湖北巡撫員缺著莊有恭戴罪署理莊有恭辦理朱  
帥一案初恐別有情節本欲俟究出實情重治其罪迨後訊明此  
案罰項尹繼善實亦與聞非莊有恭一人之意且毫無染指其罪  
止於專擅不行奏請尙在可原是以量予薄譴令其回籍治喪後  
赴軍臺效力今巡撫一時未得其人姑從權宜由軍臺廢員起用  
以觀後效恐不知者妄疑封疆重任數月之間忽予忽奪是未能

悉朕用人之苦心矣著將此諭令中外知之○諭禮部侍郎員缺著彭樹葵補授于敏中見將服閔著來京署理刑部侍郎事務服闋後再行實授○辛未諭軍機大臣等前成衮扎布等派色布騰巴勒珠爾前往追擒吞圖布等朕卽將辦理未善之處傳旨訓諭今果不出所料色布騰巴勒珠爾等旣已追及賊人猶且任其脫逃伊等動以官兵馬力疲乏爲詞獨不思賊人被追其馬力轉能馳騁乎且旣獲駢馬四百有餘何不卽以之換給兵丁奮力前往而乃遽爾回兵束手無措實屬怯懦色布騰巴勒珠爾原係獲罪之人今復令其效力軍營以贖前愆宜如何感激奮勉乃遇此數十垂斃之賊尙不思奮勇當先其罪甯可復追成衮扎布舒赫德等尙稱其斬馘甚多曲爲迴護甚屬非是此次副都統由屯及隨往官兵等尙屬出力著交部量加議敘色布騰巴勒珠爾姑從寬



免其治罪仍著成衮扎布等派兵三百名交色布騰巴勒珠爾會

同明瑞前往追擒務將吞圖布等拏獲如再行疏縱朕斷不能姑

貸○以羅源漢爲倉場侍郎

由大理寺卿還

○丙子諭軍機大臣等兆惠

已領兵往擒阿逆所有軍營事務降旨令雅爾哈善會同永貴辦

理見在擒拏扎那噶爾布尼瑪等及剿滅哈丹阿巴噶斯扎哈沁

人等遊牧俱屬緊要雅爾哈善務宜奮往辦理再剿滅賊眾應帶

兵極力搜捕不必專在濟爾哈朗駐紮雅爾哈善到軍營時卽派

遣三格等分路擒剿其附近之瑪哈沁等一併剿滅毋留餘孽前

降旨令額勒登額剿滅扎哈沁賊眾後前往策應兆惠今兆惠富

德等已經追賊遠去額勒登額諒已不能追及著卽赴濟爾哈朗

聽雅爾哈善等調遣○命河南截留明歲漕糧十萬石備賑○戊

寅命各督撫防閑幕友○庚辰諭軍機大臣等據白鍾山奏洪澤

湖水勢長發仁義智三壩過水甚多見在清口東水東壩量行寬展俾清水暢流會黃入海等語白鍾山此舉已遲矣清水原淮水故路東西兩壩古人俱有深意蓋爲淮流力弱資其堵束併力刷黃至淮水旣當盛漲之時西壩不動東壩當早爲宣洩以減其勢此固操縱由人非可膠柱至五壩則不得已而設此尾閘也欲洩水勢當在清口清口洩一分尾閘便減七八分清口壩不早爲展拓毋怪乎水勢全注五壩而高寶諸邑行被水患矣此朕今春親臨相度時所欲言而未及言者可傳諭白鍾山等嗣後清口束水東壩當秋冬淮弱時仍照舊修築束清敵黃其春夏之交一遇水漲卽行展拓開闊至盛漲時三壩等處過水一寸則東壩可開寬二丈過水二寸則開寬四丈俾得疏洩通暢不致奔赴尾閘此最要之著所當永遠通行又黃河水勢於五月下旬陡長其力旣盛

自能刷沙見在徐州一帶沙淤處所可衝刷加深否亦著白鍾山查明具奏又諭據白鍾山奏天然開添建閘板一摺尤屬遷就錯誤黃河盛漲豈木板所能堵拒從古治河未聞有以建閘爲善策者就令中造石礮分爲二門石礮能爲砥柱乎白鍾山老於河工何乃作此童稚之見此工竟不當作著將此傳諭知之○壬午諭軍機大臣等前兆惠等奏三格等帶兵追趕扎那噶爾布尼瑪至孟克圖嶺賊眾營壘甚固且山復險峻一時未能擒獲移兵至薩哩克巴哩克之前嶺前進擒擊等語昨日成袞扎布奏烏勒登等見扎那噶爾布尼瑪等同阿巴噶斯鄂拓克人眾由額林哈畢爾噶逃往喀什河地方卽帶兵往追等語則兆惠等所奏逆賊扎那噶爾布尼瑪等被三格等擊敗負險結壘而我兵阻截賊路如果嚴緊賊何致脫逃卽使逃出三格巴甯阿等亦應隨賊尾追烏勒

登等截賊之前兩路夾攻賊由何處逃竄乃成衮扎布所奏烏勒登在哈什河望見阿巴噶斯鄂拓克人眾始帶兵往擊如係邀截之兵當迎相遇何致望見賊蹤始行追擊兩處所奏全不相符著將軍成衮扎布等查明具奏卽據色布騰巴勒珠爾擒獲之厄魯特巴布朗供稱吞圖布爲其屬人所殺一事亦未可遽信見在擒拏之巴布朗或卽時正法或尙帶領行走之處亦並未明白陳奏著一併查明再從前成衮扎布等奏克喀特烏嚕特綽和爾烏喇特之鄂拓克人眾皆已招降安插地方甯謐因卽前往辦理回部等語鄂拓克人眾雖經降附不過暫行安撫不可遽信見在扎那噶爾布尼瑪巴圖爾烏巴什等及哈丹阿巴噶斯扎哈沁之厄魯特等俱未辦理况阿逆自投天網宜上緊擒拏今將正項應辦之事置而不辦乃前往辦理回部甚不合機宜朕曾屢經降旨暫

且停止辦理回人前往擒拏阿逆或又於伊等摺內批示照伊等所奏辦理此皆朕覽伊等陳奏懸揣情形將軍大臣等斷不可拘泥諭旨卽朕所降旨內有實在難行之處亦宜據實陳奏今擒拏阿逆及巴雅爾哈薩克錫喇皆適值兆惠之隊成衮扎布所領之兵相離過遠擒拏此數逆賊之事朕今皆專委兆惠而擒拏扎那噶爾布尼瑪巴圖爾烏巴什勦辦哈丹阿巴噶斯扎哈沁人眾卽專委成衮扎布彼此相機辦理不得過分畛域汝等奉到諭旨於本月初間若能擒獲賊匪甯靖地方卽由彼處前往辦理回眾如八月初間尙不能拏獲一二賊匪將哈丹阿巴噶斯扎哈沁人眾辦清則八月下旬時屆寒冬宜卽撤兵或在額林哈畢爾噶一帶地方駐紮過冬或在吐魯番巴里坤駐紮之處伊等相機定議具奏總之成衮扎布係大將軍諸事理宜相機決斷辦理不可觀望

著遵照朕旨盡心籌畫速行定議具奏○癸未諭軍機大臣等昨據喀爾喀副將軍親王桑寨多爾濟等奏原任公品級達瑪琳前往瞻禮呼圖克圖逃去見交尙卓特巴往拏等語達瑪琳係喀爾喀部內一小台吉前因勦辦包沁厄魯特等隨眾效力朕卽特加殊恩封伊爲公品級達瑪琳並不知感念朕恩擅離軍營退回游牧復附和逆賊青滾雜卜造言惑眾是以朕降旨令押解來京訊問達瑪琳畏罪不敢進京復令軍營將軍大臣及該部落副將軍等屢次遣人往召又不遵行反指稱瞻禮呼圖克圖逃去似此玷辱喀爾喀不知法紀之人宜嚴加查拏故朕降旨務將達瑪琳拏解前來專交王桑寨多爾濟辦理並傳諭哲布尊丹巴呼圖克圖知之如達瑪琳果至該處卽交尙卓特巴擒拏解送王桑寨多爾濟處遞解來京○丁亥諭軍機大臣等據兆惠奏富德等追襲阿

逆已將巴爾達穆特各鄂拓克人眾收服阿逆窮蹙奔竄如係逃  
入哈薩克地方卽領兵前往擒拏等語富德等此次奮勇追襲甚  
屬可嘉如已經弋獲自可竣事若又逃竄他往則應暫行撤兵富  
德毋庸前往哈薩克仍遵前旨俟明春再行辦理至奏請將巴爾  
達穆特等各鄂拓克人眾暫爲安撫事屬可行但伊等若聞見在  
撤兵明歲仍行前進之語必致妄生疑懼致滋事端務須密行防  
範富德著賞給荷包並發往荷包十箇著富德酌量賞給奮勇行  
走之圖倫楚奇徹布等以示鼓勵努三此次亦屬奮勉著施恩補  
授二等侍衛其厄魯特侍衛袞楚克扎布著賞給孔雀翎並銀五  
十兩所有陣亡之察哈爾子爵車凌多爾濟著交部照例議卹○  
戊子諭原在粘桿處行走侍衛哈祿前因懶惰經該管大臣參奏  
革退侍衛今伊居然自以身係額駙仍復戴頂豈有是理且額駙

何足爲重著將哈祿之額駙品級革去王公之格格額駙賽以品級原係國家優待宗室之典額駙無罪自有應得品級本身旣因獲罪革職豈可仍留額駙品級冒濫頂帶且格格一經下嫁卽爲其婦自應一律如夫額駙品級旣經革去其格格品級亦當一體斥革嗣後額駙因罪降旨革職者格格品級一併降革之處交該部會同宗人府定例具奏尋奏嗣後如有額駙等奉特旨革職及緣事斥革者將額駙一併革退其格格品級亦一併革退不准食俸看門披甲人等槩行裁革將原封冊文進繳如有開復所繳冊文照舊發還如額駙在職官任內有革職留任及降級留任者又如本身額駙品卑而見在品秩高於額駙雖有降級調任較額駙本銜尙優所有額駙品級俱免降革如在任內有降級調用者降一級則郡主額駙降爲縣主額駙以及二級三級四級皆遞降如



之格格亦隨天降等其俸及看門披甲錢糧亦照所降支領如無等可降將額駙格格品級一併革去如遇格格得罪將格格額駙革去仍留額駙本身職官再降等之格格從前所授冊封文送內閣添註降等緣由如有開復亦將冊送添註開復緣由並額駙格格降等令該處報明宗人府禮部存案載入會典從之○兆惠等奏富德遣員解阿逆之姪達什車凌至軍營親加訊問據供上年阿睦爾撒納因爲哈薩克眾人不容回至布崆地方今年二月內在博囉塔拉等處會集眾厄魯特商議共願推爲台吉阿睦爾撒納卽遣巴布克往告哈薩克求助馬駝牲隻並同往掠噶勒藏多爾濟扎那噶爾布等遊牧又遣宰桑車凌扎布至和托輝特青滾雜卜處通信阿睦爾撒納至濟爾哈朗遇見大兵卽行敗走逃至伊瑪圖鄂倫諾爾等地方因遣達什車凌赴哈薩克借兵中途被

獲見在阿睦爾撒納或仍往哈薩克或逃入俄羅斯均未可定並據副都統愛隆阿等獲阿逆遣往烏梁海塔爾巴等供亦相同應將達什車凌解京治罪其餘卽行正法報聞○己丑諭軍機大臣等前因徐州等處各工勢須分段經理且毗連之山東河南數處積水尙未消涸是以命夢麟裘曰修等往來查勘會商辦理但見據該督所奏詞意之間似有不願欽差在彼之意從來地方官不利有欽差亦向來陋習而欽差亦往往以伺察地方之事爲長此皆非從公起見著傳諭裘曰修夢麟等如地方官果有推諉不力及呼應不靈處當申飭者卽行申飭當參處者據實參奏其工程以外非職分所及不必置問貽地方督撫之口實也將尹繼善之摺及朕旨鈔寄令悉○諭尹繼善覆奏准徐水患一摺稱淮徐地勢卑窪一遇陰雨連綿卽不免浸淹雖多開河道水患仍難遽減

此實地勢使然等語所奏甚屬乖謬足見其因陋就簡之錮習始終牢不可破審爾則徐沛一帶其無城郭居民久矣且無待遠引卽自康熙雍正數十年以來其間卽不無偶被水災要皆旋淹旋涸居民咸獲安居從未有連年浸淹如近歲者此必實有致患之由爲地方計正宜悉心查勘設法宣洩爲生民除患若如尹繼善所奏水患終不可除將舉此數郡生靈盡付之不救乎抑年年賑濟月月撫綏長令其仰活於國帑乎朕非惜帑金而權出入但明知賑濟之事辦理甚難外省有司孰肯盡心民瘼自督撫以至司道守令層層皆得實心明察之人或可不致吏胥舞弊而甚難其必如此也卽一縣如此餘縣未必如此卽皆如此究之實惠所及僅免其轉於溝壑耳能如逢年之得安飽暖乎尹繼善曾不一念及此猥云地勢卑下將悉以委之巨浸是尙爲有哀憫斯民之良

心者乎至其所奏相度開濬時仰懇責成地方官俟工竣後再請  
欽差查驗等語尤爲語中有刺朕因徐州各工必須亟爲整頓而  
督撫諸臣實無暇兼顧是以遣夢麟等在彼監修見據奏荆山橋  
茶城等工俱已告竣可見實力籌辦自能奏效若非朕特遣夢麟  
至彼何以如許工程竣工迅速若此至伊等如果有藉端需索擾  
累及干與地方等事何妨據實陳奏而必隱躍其詞乎著將此一  
併傳諭尹繼善令其回奏尋奏准徐一帶水患頻仍臣親行相度  
河道欲次第辦理所謂水患難以遽減實屬悖謬至奏開河道責  
成地方辦理因原奉諭旨將積年被災之處何以永弭水患交臣  
籌辦並令夢麟會商之旨彼時尚未接到是以奏請督同地方官  
經理專其責成非別有意見臣見與欽差夢麟商酌並無彼此參  
差而欽差亦毫無需索干與之事報聞○命江南河南沿河各州

縣將淮河水勢長發情形隨時報明江南河道總督查覈